



**Найö
форйисны
Рöрфина**

М. ШУРГАНОВ

НАЙӦ ДОРЙИСНЫ
РӦДИНА

Коми книжнӧй издательство

Сыктывкар 1970

МАШИНА ПИСЬМА

АННО ДОРНИЧЫ
ПОДНА

1-6-4

4-70M

ӨТН ПОВИГЛӨН ИСТОРИЯ

Коді лыддьыліс партизанскöй отрядса вöвлөм комиссар Сöветскöй Союзса Герой Антон Петрович Бринскийлысь «По ту сторону фронта», сійö, дерт, помнитö öти интереснöйтор йылысь, коді лои партизан Иван Дёминкөд. Со мый гижöма книгаас:

«Ог вермы казътывтөг кольны сійö кадсьыс (1942 вося февраль — М. Ш.) öтитор. Геройыс сэнi вöлі сержант Дёмин, кодi чужліс Печорскöй тундраын да быдмис көр видзъсыяслөн ненецкöй колхозын. Армияö сійöс призывайтисны ещö войнаөдз на. Кокныдик самолёт нуис сэки сійöс заполяръеса призывнöй пунктсянь; сьöкыд да öдйö ветлысь паровоз вайис сійöс Западнöй Белоруссияö. Сэнi заводитчис сылөн службаыс, и нуис сійöс Дёмин ассьыс патриотическöй могсö бура гөгөрвоөмөн. Танi и нуис сійöс война, и сійö активнöя тышкасис фашистскöй захватчикъяскөд, первойсö аслас частьын, сэсса партизанскöй отрядын, көнi прöстöй зонмыс петкөдліс асьсö зэв повтөм боецөн, мудзлытөг уджалысьсөн, бур ёртөн. Тундраса олысьсö эз повзёдлыны тайö төвся көдзыдьысыс, эз воштывлыны туй вылысь ыджыд турөбъяс.

Февраль помын куим партизан, кодъяс лыдын вöлі и Дёмин, локтисны партизанскöй базаö задание вылысь. Забонье сиктын найö мытшасисны вражескöй засада вылө. Найöс кутисны лыйлыны дзик сикт помас. Кыкөн котөртисны шуйга вылө, а Дёмин шыбитчис веськыд вылө, медым кытшовтны сиктсö.

Вöлі вой. Суткиысь дырджык боецъяс вöліны кок йылын, кынмисны, мудзисны. Колö вöлі шонтысьыштны

да шойччыштны. Дёмин петіс сикт мёдар помас, кёні вёліны пывсянъяс. Сійё пырис ёти шоныд пывсянё, ко-дос, тыдалё, талун на ломтылёмаось. Кызди сёмын шоналіс, унмыс кутіс локны. Войнас фашистьяс оз локны. Оз аддзыны. Сідзкё, поэё узыштны.

Но фашистьяс аддзисны партизанёс. Гашкё, казялёмаось лым вывті кок туйсё.

Налён кё тырмис збойлуныс, вермисны пыр жё кутны узысь партизанёс. Найё вёліны дас кёкъямысён. Но смеллун фашистьяслён эз тырмы. Найё быдлаын полісны партизанъясысь.

...Дёмин бура унмовсис сёкыд да кёдзыд лун бёрын... И друг кывны кутісны лыйсьёмъяс. Сержант дась вёлі водзсасыны. Сійё босьтіс кias пистолетсё, видліс зепсьыс гранатаяс и надзёникён восьтіс ёдзёссё пёварнаяс. Лыйлісны пывсян кузя сиктсаян. Пуляяс веськавлісны ёдзёсас. Тыдалё, фашистьяс матыстчисны пывсян-лань.

Дёмин дзевсис, а врагъяс пыр матынджыкёсь. И со воисны нин дзик пывсян дорёдзыс. Регыд пырасны!.. Но сержант эз кут виччысьны. Сійё ачыс восьтіс ёдзёссё.

— Ура!..

Дёмин некымынысь лыйис фашистьяс кузя, сэсся шыбитіс граната. Взрыв... Горёдомъяс... Лэбис мёд граната. Фашистьяс ёдйё бёрыньтчисны. А партизан чепёс-йис вёрлань...»

Книгалён мёд местаын гижёма: «Ёти ыджыд диверсия оломё пёртігён пёгибнитіс миян бур боец да верной друг Иван Дёмин. Перевышколён группайс, кёні вёлі и Дёмин, муніс взорвитны вражескёй эшелон Молодечино — Минск кёрт туй вылын, Красное станция дорын. Эрдыс сэні восьса: луннас сэтчё он мун, а войнас пездъяс эз ветлыны. Миян ёртъяс мунісны сэтчё войнас да гуё дзевсьёмён дыр виччысисны. И медбёрын аддзисны, мый Красное станцияын семафорыс воссис: локтё поезд. Дёмин чепёсйис минанас туй вылө. А туй

модар боктыс насып пөлөныс локтісны немецъяс. Дыр мөвпавтөг Дёмин пуктіс запалсө минаас да шыбитіс сійөс паровозлы дзик көлеса улас. Сійө жө здукас грымөбтіс взрыв. Паровоз уси бок вылас, вагонъяс чеччалісны өта-мөд вылас... Задание лои пөртөма олөмө, но Иван Дёмин ачыс коли взорвитөм поезд улө...»

Кытысь тайө Дёминыс? Гашкө, сійө абу ненец, а коми. Сэки комиясөс да ненецъясөс соравлісны. А гашкө, и ачыс Дёминыс шуткаөн моз асьсө шуис ненецөн?

Ми заводитім корсьны Иван Дёминлысь олан туй визьсө. Вөлі ыстөма письмөяс республикаса став военкоматъясө. Печорскөй райвоенкоматсянь юөртісны, мый 1941 воын сэні призывайтчыліс Иван Григорьевич Дёмин, коді чужлөма Усть-Куломскөй районса Великополье сиктын 1914 воын. Сы йылысь лои төдмалөма уна интереснөйтор. Первойсө сійө призывайтчыліс Краснөй Армияө 1936 воын. Служба бөрын уджаліс милиционерөн, бура видзис общественнөй пөрадок. 1939 воын Иван Григорьевич комсомольскөй путёвкаөн муніс стрөитны Канин (Печора). Сэні сійө веськөдліс комсомольско-молөдөжнөй бригадаөн. А Отечественнөй война водзвылын сійөс бара босьтөны армияө.

Служитіс сійө лыжнөй батальонын отделениеса командирөн. Тышкасис Рөдиналөн врагъяскөд повтөг, ас примернас ыштөдліс боецъясөс. На райвоенкоматлөн архивысь тыдовтчис, мый сылөн геройскөя усьөм йылысь волөма юөртөм 1942 вося май 22 луно. Дзөбөма сійөс братскөй гуө Ленинградскөй областъса Молвотицкөй районуын. Сідзкө, сійө партизанөн эз вермы лоны.

Лои шыөдчыны веськыда книгалөн автор А. П. Бринский дорө, коді олө Горький карын. «Ас йывсьыс Иван Дёмин висътавліс,— юөртіс Антон Петрович,— мый сійө чужлөма Коми АССР-ын, но көні, ог төд... Советуйтча аслам вөвлөм боевөй ёртъяскөд да юөрта торйөн».

И збыльысь, регыд воис өти вөвлөм активнөй партизан Геннадий Тимуровлөн письмө. Книгаын сы йылысь

сідз жö гижöма уна. Со сылөн письмöысь юкөн: «Мöдöдчим ми боевöй задание вылö витөн, сы лыдын и Иван Дёмин. Сійö вöлі пасьталöма менсьым фуфайкаöс. а ме — сылысь плащсö. Кор заводитис пемдыны, ми кутим кыссьыны көрт туйлань. Минасö колö вöлі пуктыны Иванлы. Сійö кыссис медводзын, а ми сійöс видзим бёрсяныыс. Регыд тыдовтчис Красное станциясянь локтысь поезд. Мунис ыджыд öдөн.

Иван кыпöдчис да мöдис котöртны көрт туйлань. Ми сы бёрся. Буретш сэки мянöс казялісны немецьяс да восьтісны би.

— Пышйöй, ёртьяс! — горöдис Иван да котöртіс поездлы паныд. Здук бöрын грымöбтіс ён взрыв. Миян чуналіс пельясным. А Иван взорвитчис паровозыскöд тшöтш.

Кыдзи ме помнита, национальность сертиыс сійö вöлі коми, зэв скромнöй, спокойнöй, ыджыд вöляя, дисциплинированнöй морт».

Но кытысь тайö мортыс? СССР-са оборона кузя Министерствоысь юөртисны, мый тöдтöг вошöмьяс лыдын эм нимыс Дёмин Иван Васильевичлөн, коді чужліс 1921 воын Тентюковоын. И кутшöма жö вöлі колö шензыны, кор лои тöдмалöма, мый «тöдтöг вошöм» Иван Дёминыс öні на ловья! Пыр мунан моз пасьям, мый Тентюковоысь Отечественнöй войнаын участвуйтисны нель Иван Дёмин!

Воис письмö и Усть-Куломскöй райвоенкоматсянь. Сэні вöлі гижöма: «Юöртам, мый 1939 вося сентябрын Усть-Куломскöй райвоенкоматын призывайтчыліс Иван Николаевич Дёмин, коді чужліс 1919 воын Руч сиктын. Индöма сійöс вöлі мотомеханизированной частьö. Мый ськөд водзын вöлі, военкоматын даннöйяс абуюсь. Ачыс сійö районö бёрсö эз лок, а сылөн бать-мамыс да рöдвужыс абу нин ловьяöсь... 1940 воын призывайтчыліс сідз жö Дёмин Иван Абакумович, коді уси фронт вылын геройяслөн смертьөн 1944 воын». Письмö дорö вöлі

пуктöма Иван Николаевичлысь фотокарточка, коді сюрöма делöяс пытшкысь.

Буретш тайö фотоснимоксö и вöли мөдöдöма Антон Петрович Бринскийлы. Сійö пыр жö вочавидзис: «Нимкодь юортны, мый мян трудным эз вош весьшөрö. Ъстöм фотоснимокөн тöдмасисны уна вöвлöм паргизан. Тайö и эм буретш сійö Иван Дёминыс, коді служитис мян отрядын. Ваня Дёминöс вунöдны оз позь...».

Удайтчис аддзыны ещö öти мортöс. Тайö Керчомьяса олысь Алексей Степанович Гичев. Буретш сыкөд öглаын Иван Николаевич призывайтчыліс армияö.

— Иван Дёминкөд ми служитим öти частьын Дальной Востокын,— висьталіс Алексей Степанович.— Сійö вöли боевой, дисциплинированной мортөн. Сійö зев

бура вурис сапöгьяс, вöли мастерöвой мортөн да служитис хозяйственной взводын. Кор заводитчис война, сійöс ыстисны фронт вылö, тыдалö, аслас корöм серти. Тайö вöли 1941 вося августын. Тадзи ми сыкөд торьялім».

Тадзи öтувья вынъясөн лои тöдмалöма герой-партизанлысь олöмсö. Сійöс корсьысигөн ми аддзысьлім уна дас вöвлöм воинкөд, кодьяс дорйисны мянлысь Советской Рöдинаöс фашистской захватчикьясысь.



И. Н. Демин.

ТИХВИНСЯНЬ РЫТЫВВЫЛЫН

1941 вося арын немецко-фашистскöй захватчикьяс зiлсны кытшавны Ленинградöс Ладожскöй ты асывывв берг пöлөн да öтлаасыны финньяскöд. Ноябрь тöлысьын Волхов дорын пансисны зэв чорыд тышъяс. Сöветскöй Армиялөн частьяс изiсны противниклысь ударнöй выньяссö да сувтöдисны найöс. Но Тихвин век жö веськалiс враг киö.

...Сентябрь пом. Сыктывкар весьтын кымрасис енэжыс, пöльтiс чизыр вой тöv. Горвоенкомат дорö чукöртчисны уна йöз. Республика мöдöдис фронт вылö призывникьяслысь öчереднöй партия. Сэни ставныс том йöз карбердса сиктьясысь. Найöс колльöдисны рöдвужыс да тöдсаясыс. Нывбаба-мамьяс, пöдругаяс чышкалiсны синванысö, батыяс сетiсны пияныслы наказьяс — нöйтны фашистöс нем жалиттöг, а мукöдьяс пукалiсны чöла, зумыштчöмөн.

И друг зумыш лунсö орöдисны баянлөн мыла гөлöсьясыс. Латшкöс тушаа, нюмьялысь чужöма призывник заводитiс ворсны «Русскöй». Тайö — карысь тöдса баянист Степан Малыгин.

— Гораджыка, Стёпа, эх! — чеччыштiс йöктыны хлебокомбинатса шофёр Сергей Кузнецов. Сы бöрся ышмисны и мукöдьяс. Шогсьöмыс, быттьö, танi эз и вöвлы!

Рытланьыс Коми республикаса призывникьясöс духöвöй оркестр шыяс улын пуксьöдисны пароход вылö...

Найö воисны Архангельскöй областьö. Татчö жö воисны призывникьяс Печораысь да республикаса мукöд районьясысь.

— Тані формируйтсьö куим лыжнöй батальон,— висьталіс командир.— Ковмас велöдчыны крепыда. Миянöс виччысьö фронт.

Тадзи заводитчис боевöй олöмыс республикаса воин-лыжникъяслөн. Найö велöдчисны вöдитчыны быдсяма оружиеөн, тöдмасисны военнöй делöөн, ветлісны походъясö. Пырöвлісны рытнас казармаö — мудзöмысла кокъясыс тіравлісны. Да и сёянысь вöлі дзескыд. Но не-код эз няргы. Быдөн бура гөгөрволіс, кутшöма зэвтö вынъяссö страна, медым венны лёк врагöс.

И со воис фронт вылö мунан кад. Сы водзвылын воинъяс сетісны присяга. Быдөнöс бура пасьтöдісны, се-тісны оружие. Волховскöй фронт вылö найö воисны де-кабрь 10 лунö. Миян войска муртса на бөр мездісны Тихвин кар. Керкаяс тшыналісны, быдлаын туплясисны шойяс.

— Со мый вöчöны гадъясыд!— ыджыд лөглунөн сёр-нитісны коми воинъяс.

54-öд армиялөн командование сувтöдліс лыжникъяс водзö зэв кыв кутана боевöй мог — вөръяс пыр писькөд-чөмөн жугöдлыны противниклысь тылъяс — штабъяс, обозъяс, складъяс, не лэдзны противникöс спокойнöя овны сöветскöй му вылын.

Хык сутки чöж войяснас батальонъяс мунісны лыжи-яс вылын вөръяс да нюръяс вомөн. Быдөн зіліс öдйö-джык пырны бойö. Съökыд вöлі тайö боевöй походыс, но эз сюр весиг ни öти кольчысь. Быд боец кутіс Рөди-на водзын ассъяс ыджыд кыв кутöм.

86-öд лыжнöй батальон, кодөн командуйтіс капитан Дмитрий Григорьевич Бойченко, опытнöй да смел воин, петіс Мга — Кириши көрт туй вылö. Батальон водзын сулаліс неыджыд Лынка сикт, коді вöлі фашистъяс кыын. Командир решитіс босьтны сійöс нем виччысьтөг ата-куйтöмөн. Вынийöра «ура» поткөдіс асья сынöдсö. Öти здукөн сикт вöлі босьтöма. Сöветскöй воинъяс киö тані сюрис уна военнöй техника, автомашинаяс, вöлі бось-

тöма медводдза пленнöйясöс. Батальон сувтлытöг босьтис Глажево, Городище да мукöд населённöй пунктъяс.

Ыджыд збойлун тайö бойясас петкöдлис ротаса командир лейтенант Борис Тимофеевич Кожевин. Ачыс сийö Мохча сиктысь, ещö финскöй война дырйи на пöлучитлис Краснöй Знамя орден. Аслас примерөн сийö ышöдис лыжникъясöс тыш вылö.

— Менам ротайн ставныс пöшти вöлины Коми республикаса войтыр,— казтылö Борис Тимофеевич, кодi öни уджалö да олö Нарьян-Марын.— Менам коли фронтöвöй блокнот, кытчö пасъялöма ротаса боецъясöс, на пытшкын— ротаса писарь Дёмин, санинструктор Зеленин, снайперъяс Торопов да Дуркин, отделениеса командиръяс Кузнецов да Терентьев, боецъяс Сивков, Сажин, Бабииков... Ог тöд, колисны эз найö ловйөн. Но ставыс найö вöлины смел йöз...

Зэв съöкыд тыш батальонлы ковмис нуöдны Лезно населённöй пункт дорын, кöни противник вöли съöкыда укрепитчöма. Ещö сикт дорö матыстчигөн на лыжникъяс веськалисны фашистскöй засадаö. Гитлеровецъяс восьтысны зэв ён пулемётнöй би. Батальон танi воштис йöзлысь коймöд юкөнсö. Но лыжникъяс эз шöйöвошны. Медводзөн танi кыпöдчис взводса командирлы отсасьысь Новолучинский Чумбаров. «Водзö, Рöдина вöсна!»— горöдис сийö боевöй ёртъясыслы, и ставөн найö дружнöя уськöдчисны атакаö. Врагöс вöли шыбитöма сикт сайö.

Некымын лун чöж тайö сикт дорас мунисны вир кисьтана тышъяс фашистскöй оккупантъяскöд. Сöмын лейтенант Кожевинлөн ротайс кыпöдчылис атакаö витысь, ачыс ротаса командир ранитчылис, но бой эз эновт.

— Миян лыжникъяслөн вöли закон,— висьталö ротаса вöвлöм комсорг, öни Сторожевскöй леспромхозысь парткомса секретарь М. Королев,— кокниа ранитчин— эн эновт бой. Помнита, öти бой дырйи зэв чорыда ранитчис взводса командир Костылев. Сийöс петкöдны тшöктисны менö да Леонид Синцовöс. Ми кыкнанным

жӧ вӧлі ранитчӧмаӧсь. Кыскыны командирӧс лои зэв чорыд би улын. Туй вылас ми ранитчим мӧд пӧв, но помӧдз пӧртім ассыным боевӧй мог... А этша ӧмӧй позьӧ висътавны батальоннӧй комиссар Пономарев да партгрупорг Малыгин йылысь, кодъяс пыр вӧліны сэнӧсь, кӧні сьӧкыд...

Уна интереснӧй боевӧй делӧясыс 84-ӧд лыжнӧй батальонса воинъяслӧн, кӧні унджыкыс сідз жӧ вӧліны Коми республикаса войтыр. Торйӧн смела найӧ петкӧдлісны асьнысӧ Илларионов Остров населеннӧй пункт дорын. Батальон сэки сюрис гитлеровецъяс кытшӧ. Но лыжникъяс пытшкысь некод эз мӧвпав повзьӧм йылысь. Некымын лун чӧж найӧ водзсасисны би пытшкын, бырӧдісны некымын сӧ фашистӧс. Бырисны патронъяс, минаяс, водзсасины штыкъясӧн.

— Медбӧрря вир войтӧдз!— татшӧм вӧлі приказыс батальонса командир Н. Я. Мельниковлӧн.

Но налы отсӧгыс воис. Мездісны танкистъяс.

Вир кисьтанаӧсь вӧліны тышъясыс батальонлӧн Кириши кар дорын. Бомбаяс, снарядъяс, минаяс, пулемӧтнӧй би улын лыжникъяс кык вежон чӧж штурмуйтісны карсӧ. Но фашистъяс татчӧ вайлісны пыр выль и выль вынъяс, и сійӧс босьтны эз удайтчы. Кириши лои мездӧма сӧмын 1943 воын.

Сӧветскӧй Армиялӧн Тихвинскӧй операция босьтӧ зэв ыджыд военно-политическӧй тӧдчанлун. Ассыныс пай сэтчӧ пуктісны и Коми республикаса лыжник-воинъяс. Колӧ кутны тӧд вылын, мый тайӧ событиаясыс вӧліны Отечественнӧй войналӧн медводдза тӧлысьясӧ, кор миян воинъяслӧн эз на тырмы боевӧй опытыс, эз тырмымӧн вӧвны боеприпасъяс. Найӧ тышкасисны — эз жалитны олӧмнысӧ. Пӧсь кывйӧн лыжнӧй батальонъяс йылысь казътылӧ аслас «На службе Родины» книгаын Волховскӧй фронтса вӧвлӧм командующӧй Сӧветскӧй Союза маршал К. Мерецков.

Та вӧсна некор оз позь вунӧдны налысь подвигысӧ.

СЫЛӨН ГУЫС ЛАТВИЯЫН

Вой шөр гөгөрын аэродром вивсянь кыпөдчис гөрд звездаяса кык мотора бомбардировщик да босьтис курс-сө рытыввылө. Өні сійө нуис эз бомбаяс, а советскөй воиньясөс.

Самолёт пытшкын пукалісны өта-мөдыслы воча көкьямыс морт, ставныс коммунистьяс, кодьяс не өтчыдысь нин петкөдлісны асьнысө фашистьяскөд чорыд тышьясын.

Налөн чечыштан местаыс — Латвия, Савка-Залва вөлөстьсянь неылын куйлысь ыджыд нюр, коді вөлі латышскөй партизаньяслөн медся бур местаөн. Гожомын сэні пасьтала ылыквидзис ва, но өні, март заводитчигөн вөлі лымья на да кын — көть машинаөн ветлөдды.

Самолётлөн вына моторьяс жургом улын сёрнитны сьөкыд, и ставөн пукалісны чөла. Да и мый йылысь тани сёрнитнысө? Ставыс нин бура төдөны өта-мөднысө, төдөны, кытчө мунөны да мый найөс виччысьө.

Медводзын, лётчикьяслөн кабиналаньын, пукаліс шөркодь тушаа, стрөг видзөдласа командир, старшөй лейтенант Иван Иванович Бажуков, ськөд орччөн — комиссар Стыканс, латыш, коді лэбзис «гортас»; сэсся — пыр нюмьялысь чужөма, еджыд юрсиа радист Геня, санитарка Лилия Эглита...

Иван Иванович төлысь сайын на вөлі гортас, Троицко-Печорск сиктын. Сійөс лэдзлісны отпускө, коді коли бытьө төдлытөг. Өти прөст лун эз вөв: корлывлісны то өтилаө, то мөдлаө. Землякьяслы окота вөлі төдны ас мортсянь, мый вөчсьө фронтьяс вылын. Ветліс сійө кы-

лөдчысьяс дорö, воylvліс школаясö; кык рыт весиг выступайтис районса культура керкаын. И быдлаын сійöс кывзисны лов шысö кутöмөн.

Чужліс и быдмыліс Бажуков Троицко-Печорскын, пристаньдорса нейджыд керкаын. Помаліс школаын сизим класс да муніс кылөдчыны, вöвлі первой стахановецöн, код йылысь славаыс юргис став район пасьта. Пырис комсомолö, сэсся ыстисны велөдчыны Сыктывкарса совпартшколаö, кодöс помалöм бöрын индिसны «Печораса вөр лэдзысь» районной газетö ответственной секретарөн. Журналистской уджыс сылы воис сьөлөм вылас. Öд аслас ярьюгыд кывйөн сійö сёрнитис уна тысяча морткөд, индаліс налы югыд туй шуда олөм стрөитөм вылө.



И. И. Бажуков.

Но олөмыс вöчис мөд ногөн — газетной удж сылы лои энотны. 1939 воын Бажуковöс призываютöны Красной Армияö. Лои танкистөн, а во мысти нин ковмис тышкасьны белофиннъяскөд, кодъяс иностранной көзьяинъяслөн тшөктөм серти уськөдчисны видлыны вынйöрсö Советской государстволысь.

Отечественной война суис старшой сержант Бажуковöс Рытиввыв Белоруссияын. Сійö вöлі сьöкыд бронемашинаса командирөн да служитис Рытиввыв фронта разведкаын. Унаысь лои пöртны олөмө торъя опасной да кыв кутана боевой заданиеяс.

...1941 вося июль заводитчигөн Рытиввыв фронт нуөдис чорыд, вир кисьтана тышъяс Днепр дорын. Фашисть-

яс лёкысь зыртчисны мяян Рёдиналён съёлёмлань — Москвалань. Медым вуджны Днепрсё кокныдджыка, гитлеровецъяс шыблалісны посьяс да ляпкыд местаяс дорё ассъыныс десантъяс. Чеччөдісны татшөм десант и Радченскөй вуджанін дорё.

Буретш тайё десантсё бырөдны ыстісны фронтөвөй разведчикъясөс, кытчө веськаліс Бажуков аслас бронемашинаөн.

— Но, Коля, тыш лоё пось,— шуис Бажуков аслас отсасысь Каргинлы.

— Кувны кө — өтчыл!— нюммуніс Каргин.

— Кулөм йылысь мяянлы водз на думайтны, колё тышкасьны, Николай!..

Ю дорё разведчикъяс воисны фашистьяслы нем виччысьтөг. Ассъыс пушкасё Бажуков веськөдіс медводз фашистьяслөн кык нейджыд танк вылө, кодъяс сулалісны туй бокрын. Куимысь лыйёмөн сійө вевъяліс өзтыны тайё кыкнан танксё, сэсся пулемётсё веськөдіс немецкөй автоматчикъяс кузя, кодъяс водалісны да восьтісны быд боксянь би. Сэк кості матыстчисны и разведчикъяслөн мукөд бронемашинаяс.

— Водзё, Коля!— горөдіс аслас ёртыслы Бажуков, и бронемашина мургигтырйи чепөсйис юлань. Сэк жө машинаө мыйкө чорыда кучкис. Бажуковлөн дзыкөдз чуналісны пельясыс, здук кежлө вошліс садъыс. Сэсся видзөдліс щель пыр: машинаыс сотчө-ыпъялө!

— Коля, сотчам!— горөдіс Бажуков да видзөдліс Каргин вылө, коді бледөдөмөн пукаліс да кутіс шуйга пельпомсё, кытысь петіс вир... Машинаө веськалөма фашистскөй снаряд.

Мөвпавны вөлі некор: машина вермис взорвитчыны быд здукын. Бажуков өшөдіс пельпом саяс автоматсё, веськыд кинас босьтіс коскөдыс другсё, восьтіс бокрыса люксё да пөшти би пыр чеччыштис броневикысь. Сэсся неуна кыскис да водтөдіс боевөй ёртсё пу дорё. На дорті мунісны водзё лыйсигтырйи броневикъяс. Бажуков

косяліс Каргинлысь гимнастёркасö да кутіс көртавлыны ранасö.

— Ваня, энэвт менö,— сьöкыда кашкис Каргин.— Мун тшöтш...

— Эн увгы, Коля, ставыс лоö бур!— Бажуков тір-мунлі да лэптыліс юрсö: взрөвитчöма сылөн машинаыс... Важ моз таркөдісны фашистскöй пулемёт да автоматъяс. Водзö мунігтырйи лыйсисны и мяян броневикъяс да пода разведчикъяс. «Збыль öмöй пом?— югнитіс мөвп Бажуковлөн, да ачыс эз төдлы, кызди кинас видліс зепсыис «лимонкаяссö».— Локтасны кө фашистъяс, лыйся мед-бөръя патронөдз, сэся взрөвита ачымөс...» Но друг ставыс лөнис. Мый тайö? Бажуков сувтіс да видзөдліс водзö: ю дорын вөліны нин сөветскöй разведчикъяс.

— Ура, Коля!— уськөдчис сійö Каргин дорö.— Победа мяян!..

Рытыввыв фронтса командованиелысь боевöй заданиеяс олөмө пöртөм могысь старшöй сержант Бажуков уна рейдъяс на вöчлывліс фашистскöй тылъясö. Став тайö подвигъяссыис 1941 вося декабрь төлысьын сійöс наградитісны Боевöй Краснöй Знамя орденөн. Награднöй листас вөлі пасйöма: «Противниклөн тылын тышкасьыис группын олігөн кык төлысь чöж И. И. Бажуков петкөдліс мукөд разведчикъяслы повтөмлунлысь да збойлунлысь пример. Индөм кадö разведчикъясслөн группа вөчис татшөм удж: бырөдіс противниклысь 80 салдатөс да офицерөс, взрөвитіс 4 пос, боеприпасъяслысь склад, сотіс 5 транспортнöй машина, 2 мотоцикл. Разведчикъяс дугдывтөг минируйтісны туйяс, орьөдлісны связь...»

Уна смел подвигъяс вөчис Иван Иванович противниклөн тылын 1942 сьöкыд воын. Октябрьскöй революциялөн годовщинаö — ноябрь 7 лунö — сылы сетісны Ленин орден. Сылысь кисö топыда кутліс Рытыввыв фронтөн сэкся командуйтысь генерал-полковник И. С. Конев. Сэж жö Бажуковлы сетісны младшöй лейтенантлысь воинскöй звание.

1942 воын командованиельсь өти задание олөмө пöртiгөн Бажуков виччысьтөг веськаліс фашистьяс киö. Сійöс быд ногыс мучитісны, пытайтісны, но фронтөвöй разведчик кужис ылöдлыны гестапоöс. Мукöд пленнöй-яскöд тшöтш сійöс пуксьöдісны эшелонö, мед нуны Германияö. Но туй вылас, поезд мунигкостіыс, сылы удайтчис пышйыны да партизанъяс отсөгөн бөр воны аслас частьö. Весиг мамыслы Троицко-Печорскö сэк ыстылісны юөр сылөн пöгибнитөм йылысь.

1943 воын котыртчис Латвияса КП(б) ЦК бердын партизанскöй движение кузя штаб, кытчö начальникнас индісны Рытиввыв фронт штабысь офицер латыш Спрогис ёртöс. Сійö и корис служитны ас дінас Бажуковöс, кодöс зэв бура тöдіс.

— Меным нимкодь служитны тiян командование улын!— шуис Бажуков.

Партизанскöй штаблысь заданиеяс успешнöя олөмө пöртөм бöрын Бажуковöс лэдзлісны шойччыны гортас, Троицко-Печорскö. А öні сійö выль вынъясөн лэбис фашистьясөн оккупируйтөм Латвияö, медым кыпöдны став честнöй сöветскöй йöзöс гитлеровецьяслы да латышскöй народлөн изменникъяслы паныд тыш вылө...

Самолёт лэбис пыр водзö и водзö. Ылө нин коли фронтлөн визыыс. Көнсюрö самолёт кузя лыйлісны фашистскöй зениткаяс, корсьысисны прожекторъяс. Но сöветскöй самолётлы эз вермыны вöчны некутшöм лектор.

— Командир ёрт,— шыасис Бажуков дiнö лётчик.— Лöсьöдчöй чеччыштны, партизанскöй пасьяс тыдалöны нин.

— Лöсьöдчам!— вочавидзис Бажуков да видзöдліс аслас боевöй ёртъяс вылө. Ставөн нюмъялісны: немтор пö шогсыны, командир, дасьöсь пö.

Минутъяс кыссисны терпитны позьтöма дыр... Со и медводдза сигнал чеччыштөм вылө. Öдзöсдорса пукалысь морт сувтіс, лöсьöдыштiс парашютсö да чеччыштiс пемыд сынöдö. Сы бөрся мөд, коймөд...

Бажуков чеччыштіс медбөръяөн. Парашют көвьяс кутчысьомён сійё төвзис-лэччис кытчөкө увланы, пемыдас. Сөмын көнкө ылын югнитлывлісны автомашинаяс-лөн бияс. «Веськалам огө ас йөз дінө?»— мөвпаліс старшөй лейтенант.

Со и му. Бажуков тювмуні пу костөд лым вылө да өдйө бөр сувтіс кок йылас, лөсьөдыштіс морөс бердсьыс автоматсө, кутіс гартны парашютсө. Кор вөлі ставыс дась, гөгөр видзөдліс: матігөгөрын некод эз тыдав. А югдытөдзыс колө чукөртчыны да веськавны коймөд Латвийскөй партизанскөй бригадаса штабө, став Латвияын төдса партизанскөй командир Оттомар Ошкалн дінө.

Водзын друг куимысь югдөдыштлісны электрическөй пөнарөн: сигналыс ас йөзлөн. Бажуков веськөдчис сэтчө.

— Пароль!— горөдіс кодкө пу сайсянь.

Бажуков висьталіс, но сэк жө корис «отзыв». Ставыс правильнө. Сэсся пу сайсянь петісны нельөн. Тайө вөліны Ошкалнлөн партизаньяс. Найө висьталісны, мый куим парашютист сюрины нин, да индісны, көнөсь найө. Бажуков веськөдчис индөм местаө, а партизаньяс мунісны корсьны мукөдьясөс.

Час-мөд мысти став парашютистыс вөліны нин өтчүкөрын. Ставыс чеччыштөмаөсь бура, некод абу доймөма. Сюрины и самолётысь шыбитөм оружие да көлуй.

Югдандорыс парашютистыяс воисны партизаньяслөн штабө, коді сулаліс гырысь пожөма вөрын. «Ыдждыд му вылысь» локтөм гөстясөс пырысь-пыр жө нурийөдісны партизанскөй шыдөн. Сөйөм бөрын Бажуковөс да комиссар Стыкансөс примитіс командир Ошкалн, шөркодь тушаа, олөма нин, вежөра морт, кодлөн морөсас дзирдаліс Советскөй Союза Геройлөн Зарни Звезда.

— Виччысям, важөн нин виччысям тіянөс, Иван Иванович!— шуаліс Ошкалн.— Миян народ быдлаын кыпөдчө фашистскөй захватчикьяскөд тыш вылө, а вот бур опытной командирьясыс миян этша. Фашистыяс да латышскөй народлөн предательяс лөсьөдөны чудовищноы

план Латвиясь став йөзсө Германияö мөдөдөм кузя. Латышъясөс найö вынөн мобилизуйтöны гитлеровскöй армияö, кöсйöны сувтöдны ружье улö. Буретш та вöсна партизанитны миян динö öнi локтöны быд лун 10—20 морт...

— Кутшөм лоö миян группалөн боевöй могыс?— юалис Бажуков.

— Тiян могыс, старшöй лейтенант, котыртны выль партизанскöй отряд Рижскöй районса Бризгальскöй вöлөстдорса вөръясын. Сэни öнi партизанъяс абуöсь, и фашистьясөс некод оз дөзмөд. Колö, медым эськө став муыс сотчис оккупантъяс кок улын. Сетам ми тiянлы содтöд 5—6 партизанöс — отрядлөн подулыс лоö, а сэся сийö кутас быдмыны лунысь-лун.

— Кор миянлы петны?

— Лун-мөдсö тöдмасьöй миян йөзкөд, штабын сёрнитчöй йитөдъяс кутөм йылысь да сiдз водзö. Кор ставыс лоö дась, позьö петны туйö,— бать моз пуктiс Ош-калн кисö Бажуковлы пельпом вылас.— Миян уджыс сэтшөм: дас пөв думышт да öтчид вунды. А босьтчин кö нин вундыны, эн падъяв!

Апрель 2 лунся войö Бажуковлөн 14 морта партизанскöй отряд мөдөдчис боевöй походö Бризнальскöй вөръясö. Мазолве сикт дорын Бажуковлы юөртiсны, мый матын фашистьяс лөсьөдөмаöсь советскöй военнопленнöйяслысь лагерь, кодi шусьö Валенбургөн. Бажуков тшөктiс кык партизанлы ещö öтчид бура тöдмавны, кыдзи видзсьö тайö лагерыс да кутшөм сэни фашистьяс-лөн выныс.

— Лагерыс видзсьö кык боксянь, эмöсь пулеметьяс, охранаыс абу ыджыд — ставыс морт дас,— доложитiсны разведчикъяс.

Стыканскөд да мукөд партизанъяскөд обстановкасö бура артыштөм бöрын Бажуков решитiс уськөдчыны лагерь вылö асья войнас, кор фашистьяс медся оз виччысьны. Операция вылö поводдяыс вöли «бур»: ыджыда-

ліс лымъя туроб. Позис казятөг матыстчыны дзик лагерь бердөдзыс.

Бажуков юкис отрядсө кык пельө, медым отпырйө уськөдчыны кыкнан пост вылас; өти группаас веськөдлыны ыстіс Стыкансөс, а мөдас кольччис ачыс; кык партизанөс мөдөдіс пулемётөн видзны лагерө туйсө. Пост босьтөм йылысь сигналыс — лыйны дорыв кык ракета. Фашистьяс асьныс войнас лэдзавлөны уна ракетаяс, и партизаньяслысь сигналсө некод матігөгөрын, дерт, оз гөгөрво.

Пост дорө медбөръя метрьяссө партизаньяс матыстчисны кыссьөмөн. Со и фашистьяслөн часөвөй, дзуртөветлөдлө пост водзын, юрсө лэдзөма, көдзыдысла лэптөма шынель воротниксө. Пост вевт вылын — пулемётной башня, но сэні некод оз тыдав. Бажуковлөн чужис операция бурджыка нуөдан план: гусьөн вины часөвөйсө, сэсся кык мортлы кайны пулемётной башняс, медым бырөдны сэтысь фашистсө, эм кө сэні сійө, а аслыс мукөдыскөд бырөдны охранникьясөс пост пытшсьыс.

Партизаньяслөн шуд вылө ставыс артмис сідзи, кызди и көсийс Бажуков. Керка пытшкас нин ковмис лыйны сөмын кык фашистсө, мукөдсө лои помалөма шытыкьяс отсөгөн. А башняыс вөлөма тыртөм.

— Кыкысь дорыв лыйөй ракетаясь,— тшөктіс Бажуков да кутіс видзөдны мөд постлань.

Ракетаяс здук кежлө югдөдлісны ывласө да кусіны. Бара лои гөгөр чөв-лөнь. Важ моз шутьяліс турөба төв. Но Стыканссянь сигнал эз вөв. Гашкө, найөс казьялісны? Бажуков көсийс нин ыстыны сэтчө асьыс йөзсө, но друг кыкысь ыпнитлісны ракетаяс — виччысяна сигнал эм!..

Лагерысь партизаньяс мездісны 17 сөветскөй военнопленнойөс, кодьяс пырысь-пыр жө лоины отрядса воиньясөн. Тырмымөн сюрис оружие да боеприпас. Отрядлөн выныс содіс кык пөв. Оні позис вөчны гитлеровецьяслы паныд гырысьджык операцияяс.

Валенбург лагерь босьтөмысь Бажуковөс пөся ошкис

партизанскöй бригадаса командование, кодкөд йитөдсö кутісны рация пыр. Öттшөтш воис приказ жугөдны Ментос станциясянь неылын сулалысь Давдзава вөлөстьысь фашистскöй гарнизон да бырөдны сэтысь гитлеровець-яслысь боеприпасъяс тыра гырысь складъяс.

Партизанъяс лөсьөдісны ассыныс базасö Югвас хуртордorsa вөрö. Олісны лыскысь вөчөм чомъясын. Поводдяыс ёна шондөдіс, корсюрö зэрис, сылі став лым-йыс. Тайö, дерт, сьөктөдіс партизанъяслысь олөмсö.

Бажуков отрядлөн разведкаса командир Голоферин юрнуөдөм улын Давдзава дорö ветлісны пöшти быд вой: колö вөлі төдмавны, кытчö кучкыны медводз, медым нюжмасьтөг пасьвартны врагöс. Ветліс разведкаö и ачыс Бажуков. Тэрмасьны татшөм ыджыд делöын эз позь.

Партизанъяс, дерт, эз пукавны дзик «уджтөг». Ювгас хуторын найö бырөдісны став полициясö, а комендатурасö сотісны. Посньыдик диверсияяс, засадаяс вөчлісны туйяс вылын.

Öтувъя тышын ёнмис партизанъяслөн дружба. Стыканскөд найö лоины дзик вокъяс кодьöсь, сёйисны и узьлісны пыр öтлаын. На дінын жö пыр оліс и санитарка Лилия Эглита.

— Война бöрын, Ваня, кутам овны Ригаын!— сёрнитліс комиссар.— Став Европаын сійö медся мича кар! А мый сулалö Рижскöй море дорыс!

— А кытчö сійö кольччас?— мелі лөз синъяснас нюмъяліс Лилия.— Гашкө, сійöс кутшöма виччысьöны гортас?..

— Пöрысь мамысь кындзи, менö виччысьны некодлы. Нывъяскөд төдмасьлыны, веськыда кö шуны, эг вевъявлы,— вочавидзис Бажуков.— Велөдчи, уджалі, сэсса— армия, фронт... Сьөкыд олөм миянлы уси. А война бöрын ме муна аслам Печораö. Эк, кутшөмөсь сэні эрдъясыс, юясыс, вөръясыс! Уна сё километр мунан да мортöс он аддзыв... Вот помасяс войнаыс, и мунам ми тэкөд, Лилия, Печораö!— серөктіс Бажуков.

— Ме тiян ногсö и сёрнитныис ог куж,— гёрдöдыштiс ныв.

— Велалан!

— Кывзы, Ваня!— друг шуис комиссар.— Ветлам кутшöмкö вöлöстьö сёрнитыштны мяян йöзкöд. И асьным бурджыка кутам тöдны, кызди найö олоны, лосьöдам йитöдьяс.

— Бур мöвп,— ошкис Бажуков.

Аскинас мукöд партизаньяскöд тшöтш найö волiсны Курменскöй вöлöстьö, кöни фашистскöй частьяс эз сулавны. Сиктса олысьяс полiгтырйи петiсны площадь вылö: öд найö война чöжыс на эз аддзывны ловья партизаньясöс. Йöз водзын сёрнитiс латышскöй кыв вылын комиссар Стыканс. Сийö висьталiс, мый абу нин ылын сийö кадыс, кор фашистскöй ордаясö лоö шыбитöма сöветскöй му вылысь, да чуксалiс крестьянаöс босьтчыны тышö. Сэк жö унаөн шуисны мунны партизаньяс дiнö. Но найöс öни эз босьтны, тшöктiсны нөрöвитыштлыны.

Дерт, эз узыны и фашистьяс. Найö медводдза луньяссяныс нин, кор вöли мездöма военнопленнöйясöс Валленбург лагерысь, кутiсны кыйöдчыны выль партизаньяс бöрся. Буретш Курменскöй вöлöстьсянь кутшöмкö предатель юөртöма фашистьяслы, мый сэни петкöдчылисны партизаньяс.

Вöлöстьысь бөр мунан туй вылын партизаньясöс паныдалiс фашистскöй карательяслөн экспедиция. Пансис чорыд тыш, усины некымын партизан, тшöтш и комиссар Стыканс. Но карательясöс век жö лои венöма.

Аскинас — тайö вöли апрель 16 лунся асылö — карательяслөн ыджыд отряд друг петкöдчис партизаньяслөн базасянь неылын. Фашистьяслөн выныс вöли дас кымын пöв ыджыдджык. Найö шышйысисны став вөр пасьталаыс. Öни мунны мöд местаö лои сёр нин: фашистьяс пöшти кытшалiсны вöрсö. Бажуков шуис водзсасыны помöдз. Неуна лыйсьöм бöрын бой местасö сийö бөрйис

нейджыд нюр шөрө, көні дорйысьнысө вөлі кокныд-джык.

— Кулам татчө, а фашистьясөс огө лэдзөй!— ветлөд-ліс Бажуков партизанъяс дінті да индаліс, кыдзи бурджыка бөрйыны лыйсьөм вылө позицияс.

Со кутіс матыстчыны карательяслөн медводдза цепь. Эсэсовецъяс локтісны сувтсөн, автоматъясысь лыйсигтырйи, вөйласисны ва гуранъясө.

— Би!— горөдіс Бажуков партизанъяслы, кор фашистьясөс бура нин позис босьтны прицел вылө.

Пөшти час чөж кыссис тайө чорыд тышыс. Уна дас карательөс вөлі виөма да ранитөма, и налы бөр ковмис бөрынтьчыны. Ыджыд воштөмъяс лоины и партизанъяслөн.

Час-мөд мысти карательяс петісны партизанъяс вылө атакаөн кык боксянь нин. Но и тайө атакасө лои венөма партизанъяслөн смеллунөн. Фашистьяс бара бөрынтьчисны, найө колисны уна шойяс. Бой дырйи усины и миянладорсянь: радист Геня да ещө некымын партизан, содісны и ранитчөмъяс. Ачыс Бажуков ранитчис пель-помас, но өти здук кежлө эз эновтлы бойөн веськөд-лөмсө.

Рытьядорыс нин, кор кутіс пемдыны, фашистьяс восьтісны партизанъяс кузя зэв чорыд артиллерийско-миномётной би. Снарядъяс да минаяс потласисны пу йывъясын и муын, лөдзъяс моз быдлаын дзизъялісны осколокъяс, көдзисны смерть.

Бажуков кольөдіс ас дінас вит мортөс, медым кутны атакуйтись карательясөс, а мукөдъяслы тшөктіс босьтны раненөйясөс да писькөдчыны враглөн кытшысь.

— Ме татчө жө кольчча!— шуис Бажуковлы Лилия Эглита.— Кувны кө — өтлаын...

Бажуков нюммуніс да меліа видзөдліс збой латышской ныв вылө, быттьө көсйис шуны: «Кутшөм тэ югыд морт, Лилия!..».

Карательяс выльысь восьтісны ураганной би да гор-
зігырйи кутісны локны партизанъяслань.

Бажуковлы бара ковмис кутчысьны пулемёт гашет-
каё. Парсё курччёмён лыйсисны Эглита, разведкаса
командир Голоферин, мукөдъяс. Недыр мысти нин найё
сьёкыда ранитчисны. Бажуковлы пуля веськаліс морөсас:
сійё ойдіс вирён. Разведчик Голоферинлөн өдва тырмис
выныс, медем лыйны асьсё. Кыкнан кокас ранитчём
Лилия взорвитіс асьсё гранатаён...

Но век жё фашистьяс эз лысьтны пырны пемыднас
партизанъяс дінё. И кор матыстчисны мөд асывнас, ад-
дзисны сөмын партизанъяслысь шойяссё да кылісны пу-
яслысь шувгөмсё...

Тадзи пөгибнитіс немецко-фашистскөй захватчикъяс-
көд тышын Троицко-Печорскса зон, коммунист, комсо-
моллөн быдтас Иван Иванович Бажуков.

Латвияса уджалысь йөз эз вунөдны Иван Иванович-
лысь подвигъяссё. Сылөн гу вылө сувтөдөмаobelisk-
памятник. Герой-партизанлысь нимсё новлөдлө Латвия-
ысь өти школаса пионерскөй организация. Иван Бажуков
нима улича эм сылөн рөднөй сиктын — Троицко-Пе-
чорскын.

ВИТ ОРДЕНА КАВАЛЕР

ОПИСАНИЕ

Быдөнөс аслыс ног суис война заводитчөм. Отияс лосьодчисны мунны заводо смена выло, модъяс — петны видз выло ытшкыны турун, коймодъяс дежуритисны больничной палатаясын. Ставон олисны гажа мирной оломон. Вөлі 1941 вося июнь 22 лунся шондіа асыв. Радио вайис странаса став пельосьясө нем виччысьтөм юор — война!..

Ыб сиктса зонмөс, Афанасий Худоевөс война суис шондіа Кавказын. Сійө тані служитіс өти пехотной частьын. Сылы кольлі ветлыны руд шынельон сөмын некымын төлысь, арөдзыс, а сэсса позис мунны гортас, колхозө, көні сійө и уджавліс.

— Кутасны миянөс лэдзавны армияысь, мунам, Афоня, миян Кубаньө. Кубаньыд — озыр му! — шулывліс Худоевлы ёртыс, кодкөд служитіс өтилаын.

— Мунам, другө, Сибирө, — корлывліс мөд ёрт. — Байкал дорын кодь мича местаыс некөн абу.

— Бур тіян муясныд, — вочавидзліс Худоев, — но Коми му меным медся ёна кажитчө: рөдной вөр-ва менө кыскө...

И со июнь 22 лунся асылө друг лоис боевой тревога. «Бара, көнкө, кутшөмкө учениеяс!» — ропкисны өткымын салдатьяс, кодъяслы вөлі жаль асья чөскыд унмыс. Частьысь личной составсө прөверитөм бөрын кыв босьтіс полкөвой комиссар.

— Ёртыяс-воиньяс! — юргис сылөн гөлөсыс став строевой плац пасьта. — Талун асыв фашистской Германия көин моз гусьон уськөдчис миян Рөдина выло...

Июль төлысьын нин Афанасий Худоев веськаліс фронт вылө, тышкасис Киев дорса бойясын. Фашистьяс усьласисны гырысь вынъясөн, киськалісны свинеч зэрөн пулемётъясысь да автоматъясысь, лыйлісны орудиеясысь да миномётъясысь, лун-лун бомбитісны «юнкерсьяс»... Съөкыд вөлі миян боецьяслы, но найө кутчысисны кыз-мый вермисны.

Татшөм пось тышас Худоев вөлі сөмын өти вежон, сэсся ранитчис да ковмис мунны госпитальө.

Бурдөм бөрас сійө көсийс веськавны бөр аслас полкө, аслас ёртъяс дінө, но армейскөй штабса офицер сөмын нюммуніс:

— Эк, дона ёрт! Татшөм пось каднас не сөмын полк, но и быдса корпус съөкыд корсьны!..

Афанасий Демьянович веськаліс зенитнөй батареяө. Кык вежон муніс орудиеясөн төдмасьөм вылө, а сэсся— бара фронт! Оні нин ковмис дорйыны Харьков — Украиналысь медыджыд промышленнөй центрсө. Враг зыртчис ещө ыджыдджык скөрлунөн, быттьө дойдөм зверь. Эз кольлы лун, медым эськө фашистскөй стервятникъяс эз бомбитны зенитчикъясөс. Оти татшөм бомбёжка дырйи стройысь петісны став орудиеясыс, а батареяысь колины сөмын морт дас, на лыдын и Худоев. Тыдалө, эз прөста шуткаөн шу сылы госпитальса хирург: «Коді первойя бойын ранитчис, сійө пыр кольө ловйөн».

Худоев да сылөн ёртъясыс эновтісны жугавлөм орудиеяссө да кутісны корсьны кутшөмкө воинскөй часть, медым водзө тышкасьны фашистьяскөд. Сэки и найө паныдасисны өти сикт дорын неыджыд командакөд; старшөйнас вөлі сэні пехотнөй майор.

— Лоанныд миян командаын,— шуис майор-артиллерист зенитчикъяслы,— водзө мунны некытчө: кытшынось! Чөжыштам вынъяс и кутам писькөдчыны бойөн.

Тайө вөлі дзик виччысьтөм юөр. Но война эм война, и быдтор вермис лоны. Оні Худоевлы сөмын коли пырны майор команда улө.

— Тан мыйкө абу ладнө!— ропкисны өткымынъяс.—
Со и лоө пыр бөрынтьчыны!

— Россия ыджыд. Коркө сувтам!— шуалисны
мөдъяс...

Кытшө веськалом воинъяс быдса вежон чөж муни-
ны асыввывланы, кызвыннас войясын. Унаысь ковмыліс
петавны виччысьтөм атакаө, медым восьтыны водзө
мунан туйсө. Аскөдныс жө нуисны и раненөйясөс. Тадзи
тшыг нисьө пөт найө и вуджисны фронтлысь линиясө да
бөр воисны асланыс войска дорө.

Кытшысь петөм йөзөс ставнысө нуисны тылө выль
частьяс формируйтанинө. Афанасий Худоев веськаліс
318-өд стрелкөвөй дивизияса противотанкөвөй дивизи-
онө, коді сулаліс Кубанын. Кыдзи вөвлөм воинөс,
коді кывліс нин порок тшын дуксө, индісны 45-миллимет-
раа пушкаса командирөн, сетісны младшөй сержантлысь
звание. А төлысь мысти бара ковмис петны дорйыны
Новороссийск кар.

Сьөкыдөсь вөліны тани, важ Новороссийск дорын,
оборонительнөй тышъясыс. Гитлеровецъяс зілісны пыр-
ны Кавказө, и первой каднас быд лун петавлісны атака-
ясө. Но 318-өд Новороссийскөй дивизия чорыда кутіс
ассыис позицияссө.

Худоевлөн артиллерийскөй расчөтыс сулаліс море
берег дорын, дзик передөвөй вылас, та вөсна артилле-
ристъяс олісны вулкан вылын моз: фашистъяс пыр ку-
тісны найөс прицел вылын. Орудиелысь сулалан местасө
ковмыліс вежлавны быд вой, медым дзєбны сійөс
врагысь.

Немецъяс сідз жө мудера көсйисны бырөдны мян-
лысь огневөй точкаяс. Найө вөчисны порта волнорез
вылө мыйкө дот кодьөс да сувтөдісны сэтчө пушка. Бой
дырйи тайө вөлі зєв опаснө, вермис вөчны уна пакөсть.

— Командир өрт, лэдзөй меным бырөдны тайө
дотсө,— взводнөй дінө шыөдчис Худоев.

— Кызди тэ косьян сійос бырөдны?— чуймис командир.

— Ме гусьон уя ваодыс дамба пөлөныс, сэссия шыбита амбразураас гранатаяс...

Взводной лэдзис пөртны олөмө Худоевлы ассьыс смел плансө. И со сійө петіс операция вылө веськыда лун шөра лунын. Войнас фашистьяс сюсьджыка видзөдісны берег дорьяссө. Худоев вөчис төлкөн. Збой воин бөрся видзөдісны передөвөйсянь уна син.

Со сійө пыр матынджык и матынджык цельсянь. А мыйон воис сы дорө, кутчысис өти кинас волнорез дорышө, кыпөдчыліс да шыбитіс граната чукөрсө дотө. Грымөбтіс зэв ён взрыв...

Немецьяс друг мөдісны кыздсюрө лыйлыны пулеметьясыс да минометьясыс, но збыльыссьө найө эз төдны, мыйыс взорвитчис дотыс. Дамба сайті уйыс Худоевөс, дерт, найө эз казявны.

— Молодеч!— топыда кутыштіс сійос взводной.

А недыр мысти тайө подвигсьыс дивизияса командир полковник Гладков сетіс Афанасий Демьяновичлы правительственной награда — «За отвагу» медаль. Дивизионса артиллеристьяс пөвстын Худоев первой мортөн босьтіс награда.

Тамань көддын ыджыд бойяс пансисны 1943 вося гождөмын. Советскөй Армиялөн частьяс петісны фашистьяслы паныд решительной штурм вылө да орөдісны налыс сідз шусяна «гөлубөй линиясө», кодөс немецьяс лыддисны венны позьтөмөн. А регыд мысти советскөй воиньяс воисны Керченскөй пролив дорө. На водзын сулаліс выль боевой мог — мездыны Крым.

...Төвзысьөм море скөраліс, ызгис гырыс веж гысөн. Юр весьтын уліті лэбисны сьөд кымөрьяс. Но военной катерьяс мунісны войся пемыдас пыр водзө и водзө Крым береглань, көні корсюрө югнитлывлісны вражескөй прожекторьяс.

Афанасий Худоевлөн расчётыс пукаліс катер бөжын,

а налӧн орудиеыс локтіс пур вылын, кодӧс кыскис катерыс. Артиллеристъяс чӧв олісны, быдӧн мӧвпалісны матысмысь десантнӧй операция йылысь. Бура-ӧ помасяс сійӧ? Казяласны оз найӧс фрицъяс?

— Афоня, висътав мыйкӧ,— тувкнитіс наводчик Иван Мухин,— кадыс ӧдйӧджык мунас!

— Талун сьӧкыд меным,— ышловзис Худоев.— Горсянь со юӧр воис: усьӧма ыджыд вокӧй, Илья...

Вӧлі нин асья вой, кор медводдза десантнӧй группаяс петісны Эльтиген посёлокдорса берегӧ да нем виччысьтӧг зырисны противникӧс море дорысь. Лои босьтӧма неыджыд плацдарм. Но фашистъяс некыдз эз кӧсйыны миритчыны тайӧн да быд боксянь восьтісны ураганнӧй артиллерийскӧй да миномётнӧй би, медым торкны мукӧд катеръяс вывсьыс десантникъяслысь берегӧ чеччӧмсӧ.

Чорыд артиллерийскӧй би улӧ веськаліс буретш Худоевъяслӧн катерыс. Некемын снаряд швачӧбтісны судноӧ, сылӧн розяліс бокыс, а сэсся недыр мысти судноыс вӧйис... Боецъяс пӧвстысь, коді коли ловйӧн, лоисны ва вылын восьса морейн.

— Кутчысьӧй!— шуаліс аслас ёртъясыслы Худоев.— Спаситасны... Война, немтор он вӧч...

И артиллеристъяс кутчысисны. Бур, мый ваыс вӧлі шоныд, да ки улӧ сюрисны пӧвъяс. Час куйм мысти локтіс на дінӧ сторожевӧй катер да петкӧдіс «ыджыд му» вылӧ.

Кык лун мысти Худоевӧс да сылысь расчӧтсӧ вуджӧдісны пролив вомӧн мӧдысь. Ӧні нин ставыс артмис бура да ӧдйӧ. Югдытӧдз налӧн орудиеыс сулаліс нин передӧвӧй вылын.

И бара бойяс...

Нелямын лун чӧж 318-ӧд Новороссийскӧй дивизияса десантникъяс кутісны Керчь карысь лунвылын плацдарм. Мый сӧмын эз вӧчны немецъяс, медым шыбитны советскӧй воинъясӧс мореӧ, но став зільӧмъясыс лои-

ны весьшөрө. Вөліны сэтшөм луньяс, кор фашистскöй танкьяс волісны десантникьяслөн окопьяс дорөдз 20 — 30 метр ылнаө. Буретш татшөм бойяс дырйиыс ассьыныс смеллунсö петкөдлісны артиллеристьяс. Сөмын öти татшөм пось лунö Афанасий Худоевлөн расчөтыс сотіс 5 фашистскöй танк.

Часть, көні служитіс сержант Худоев, честьөн пөртіс олөмө ассьыс боевöй могсö. Сійö кыскис ас дінас фашистьяслысь гырысь выньяс. Буретш та вöсна кокныдджыка мунісны главнöй десантнöй операциясыс Керчь көджын да Сиваш вылын. Сэк жö 318-өд Новороссийскöй дивизияса воиньяс вөчисны ещö öти чуймөдана подвиг: найö орөдісны öти местаті фашистьяслысь оборонасö, пырисны 25 километр кымын налөн тылö да штурмөн босьтісны зев ёна укрепитөм Митридат гөра. Худоев тышкасис жö тані. Öні Эльтиген мыс вылын и Митридат гөра вылын сулалөны сөветскöй воиньяслы ыджыд мича памятникьяс.

Афанасий Худоев участвуйтис и легендарнöй Севастополь да Херсонес мыс мездөмын. Тайö бойясыс лыддыиссьөны Крымскöй военнöй эпопеяын медся ярьюгид лист бокаясөн. Худоев аслас пушкаысь лыйліс фашистскöй оккупантьясöс став мирлы төдса Сапун гөра вылын, Бахчисарай дорын, Херсонес бухтаын. Сэкинин 76-миллиметраа пушкаысь.

А водзö мый вөлі Афанасий Демьяновичкөд? Аслас частькөд сійö муніс кузь боевöй туй Днепр дорсянь да Германияөдз. Боевöй ёртьясыскөд сійö мездіс Рытывыв Украинаса, Польшаса, Чехословакияса карьяс да сиктьяс. Чорыда тышкасис Карпатскöй да Судетскöй гөраяс вылын. Кызди висьталö война кадся награднöй листыс, Карпаты гөраясын öти танкөвöй контратака дырйи сержант Худоев жугөдіс аслас орудиеысь 4 фашистскöй бронированнöй машина. Кызди сөветскöй салдат, сійö пунктис ассьыс пай народьяслөн медлөк враг вылын, фашизм вылын, победа шедөдөмө.

«Отечественной война», Красной Звезда срденья, куим Слава орден да уна медаль мичмодоны Отечественной война ветеранлысь мороссо.

Они Афанасий Демьянович Худоев оло Сыктывкар бердса Вылыс Чов посёлокын. Армияысь сийо демобилизуйтчис 1946 воын, уджаліс МВД органьясын, а они неважон петіс пенсия выло да кладовщикало посёлокас. Быд асыв сийо муно мирной удж выло да кольодо Мадлена нывсо да Толя писо школао, медым эсько найо эз жо сёрмыны.

Боевой наградаысь Афанасий Демьяновичлон куйлоны мичаник пу шкатулкаын. Но корсюрю найос кывылло ошодлыны и моросо: сийос корлывлони школаясо, том йоз діню, медым казтыштны советской йозлон Отечественной войнаывса подвигыяс йылысь.

— Ми тодам, мый сэтшом войнаыс,— висьтало вөлөм фронтөвик.— Сы вөсна и тышкасям, медым сийос быродны дзикодз йоз оломысь.

КУРСКОЙ ДУГАСА ГЕРОЙ

...1943 вося июль тóлысь. Немецко-фашистской ко-мандование дасьтис ыджыд наступательной операция Курской дуга дорын. Гитлеровской генеральяс сувтö-дисны мог — кыпöдны асланыс салдатьяслысь боевой духсö, кодi вöли дзыкöдз нин усьöма Сталинград бöрын.

— Тайö наступлениеыс бырöдас Красной Армияс, да ми шедöдам победа! — ошйысис гитлеровской министр Риббентроп.

Наступательной операциялы вöли сетöма кодöвой ним — «Цитадель». Курск районö фашистской командование чукöртис пöшти миллионной армия, 10 тысяча орудие, 3 тысяча сайö танк, 2 тысяча самолёт да мукöд боевой техника. Медводдзаяыс танi фашистьяс петкö-дисны «Тигр» танкьяс да «Фердинанд» самоходной артиллерийской установкаяс.

Первой видзöдлас серти кажитчис, мый нинöмön он вермы сувтöдны тайö военной машинасö...

Но Гитлер да сылön генеральясыс ещö öтчид чоры-да сорассисны. Найö медводз эз артыштны советской воинлысь сьöлöмсö, враг дiнö сылысь вöвлытöм скöр-лунсö. Советской солдат дась вöли сетны Рöдина вöсна тышын весиг олöмсö.

Буретш татшöм салдатön и вöли майор Николай Се-мёнович Нестеров. Сылön олöмыс нинöмön эз торьяв мукöд советской том йöзлön олöмысь. Чужлис да быд-мылис сийö Кöрткерöсын. Батьсö эз тöдлы — сийö усьли гражданской война дырйи Печора вылын. Уджавны Ни-колайлы лои водз — 15 арöссиянь. Красной Армияс

сійӧс босьтисны 1940 вося арын, кор Европанын ыпъяліс нин война. Вєськаліс сійӧ Харьковса военно-политичєскӧй училищєӧ. Отечественнӧй войналӧн медводдза тӧлысьясӧ сійӧ воюйтис пулемѣтнӧй ротаса политрукӧн.



Н. С. Нестеров.

Тышкасис уна сьӧкыд бой-ясын, кыкысь ранитчыліс. Недыр велӧдчыштис, лои ротаса командирӧн, сєсса батальоннӧй командирӧн.

Аслас боевӧй делӧяс йылысь частӧ сійӧ гижлывліс Кӧрткерӧсӧ мамыслы. Тайӧ письмӧясас рӧмпӧштанын моз зєв бура тыдалӧ пӧсь сьӧлӧма коми зонмыс. «Дона мам!— гижӧ сійӧ 1942 вося июльӧ.— Коли нейджыд кад, медым бара пасйыштны ас йылысь некымын кыв. Бӧръя кык тӧлысьӧ ковмис волыны Донбассӧ, Харьковскӧй, Курскӧй, Воронежскӧй областьясӧ. Ӧні сулалам Дон ю дорын, тышкасям фа-

шистьяскӧд Воронеж карсянь лунвылын. Участвуйт уна боевӧй операцияясын, но пыр на ловъя. Нӧйтам фашистскӧй зверӧс пыр чорыдджыка».

Медым бурджыка гӧгӧрвоны тайӧ «чорыдджыка» кывсӧ, вайӧдам сылысь награднӧй листсӧ, кор сійӧс наградитисны Краснӧй Знамя орденӧн. Бумагасӧ кырымаліс мӧдӧд гвардейскӧй танкӧвӧй корпусса командир генерал-лейтенант Баданов. «Нестеров ѣрт командуйтис первой батальонӧн 24-ӧд гвардейскӧй мото-стрелкӧвӧй бригадаын. 1942 вося декабрь 20 лунсянь 1943 вося январь 10 лунӧдз аслас батальонӧн сійӧ

мездіс фашистскöй захватчикъясыс Дьяково, Кощевка, Михайловское да Масловка населённой пунктьяс противниклөн гырысьджык вынъяс вылө видзөдтөг. Аслас повтөмлунөн сійö петкөдлө став воинъяслы пример.

1942 вося декабрь 27 лунö Нестеров аслас батальонöн кутіс оборона Тагинскöй дорын. Противник пыр атакуйтіс, но весьшөрö. Батальон бырөдіс противниклысь быдса батальон да 4 танк. Тайö отсаліс петны окружениеысь корпуслы ставнас.

1943 вося январь 8 лунö Нестеровлысь батальонсö кытшалісны фашистскöй захватчикъяслөн пехота да танкъяс. Гвардияса капитан Нестеров ачыс медводз кыпөдчис атакаö да ас бөрсяыс нуөдіс боецъясöс. Противниклысь кытшсö вöлі орөдöма...»

Великöй Отечественнöй войналөн тайö сөмын неыджыд эпизодъяс, кодъяс лоины кутшөмкө öти тöлысьöн. Висьтавны кө Нестеровлысь став подвигыяссö, колö гижны быдса книга. Участвуйтіс сійö Сталинградскöй, Воронежскöй, Брянскöй да мукөд фронтъяс вылын. Аслас боевöй подвигыясыс сійöс вöлі наградитöма куим Краснöй Знамя, I-й степеня Отечественнöй война орденъясөн да мукөд наградаясөн. Сылөн боевöй делöяс йылысь гижлісны фронтөвöй газетъяс.

Со кутшөм воинъяслы сөветскöй командование индіс дорыны рөднöй му фашистскöй армадаысь Курскöй дуга вылын.

Фашистскöй командование заводитіс наступлениесö уна вожөн став Курскöй дуга пасья июль 5 лунся асылын. Но сөветскöй танкистьяс, артиллеристьяс, пехотинецьяс, лётчикьяс сулалісны чорыда. «Ни öти васьков бөрö!»—татшөм вöлі шуөмыс сөветскöй воиньяслөн.

Курскöй областын эм неыджыд Прохоровка сикт. Сэтчө буретш и веськөдіс фашистскöй командование асьыс медбур вынъяссö. Немецкöй захватчикьяс ещö

өтчүд көсйисны видлыны ордны оборонасө Сөветскөй Армиялысь. Фронтлөн быд километр вылө противник шыбитіс 300 танкөдз, медбур эсэсовскөй дивизияяс. Тані заводитчис зэв ыджыд да вир кисьтана тыш. Тыр-мымён шуны, мый кыкнанладорсяныс Прохоровка сиктдорса тышын участвуйтісны 1 500 танк.

Буретш тайө вир кисьтана тышас и веськаліс аслас мотострелкөвөй батальонөн майор Нестеров.

Медся сьөкыд тышсө сылы ковмис нуөдны июль 14 лунө. Фашистьяс петісны атакаө зэв ён артиллерийскөй подготовка бөрын водз асылын. Взрывъясысь потласис да тіраліс муыс. Быттьө эз нин коль ни өти метр, кытчө эськө эз усь мина, снаряд либө бомба. Сьөкыд тані вөлі кутчысьны. А Нестеровлөн гвардеецъясыс кутчысисны. Лунтырөн найө венісны 8 вражескөй атака, бырөдісны 500 сайө вражескөй салдатөс, но враглы эз сетны ни өти вершөк му. Ачыс майор Нестеров пыр ветлөдліс ротаысь ротаө да ышөдіс боецъясөс подвигыяс вылө.

— Кыкысь он кув, а өти смертьыд быдлаын воас!— шмонитіс сійө боецъяскөд бойяс костын.

Но тайө жө рытас Николай Семёнович дорын төдлытөг взорвитчис снаряд. Өти осколок сылы веськаліс кынөмас. Боецъяс босьтісны командирнысө ки выланыс да нуисны медсанбатө, но майор эз нин во сэтчө ловйөн.

Тадзи помасис олөмыс Курскөй дугавывса тышын гвардияса майор Николай Семёнович Нестеровлөн, Көрткерөс сиктса коми зонлөн.

СИҮӨ ВӨЛІ САПЁРӨН

...Пемыд арся вой. Укрепитчөм фашистьяс пөшти быд минутын югдөдлісны ассыныс оборонасө ракета-ясөн, лыйсисны пулеметьясысь да минометьясысь. Найо полісны, медым эськө төдлытөг эз матыстчыны советскөй разведчикьяс.

Гитлеровецьяс, дерт, эз төдны, мый налөн дзик ныр улас кыйөдчөны нин куимөн: кык разведчик да сапёр Николай Ларуков. Налы вөлі сетөма боевөй мог — любөй донөн вайны «язык». Наөдз унаөн нин ветлісны, но вольвлісны куш киөн. Вывті нин сьөкыд вөлі босьтны тані ловья немецөс.

Николай Ларуков уджаліс кань моз. Кор ломзыліс ракета, разведчикьяс из моз водлісны муас. Ларуков надзөникөн пыр кыссис медводзас да перьяліс вражескөй минаяс — востіс туй. Со и проволочнөй заграждение, а на сайын — враглөн окопьясыс. Ларуков орөдіс өти, мөд, коймөд сутуга... Кор артмис морт төриг розь, өвтыштіс кинас ёртьясыслы: позьө пө чеччыштлыны окопө.

Өти здукөн разведчикьяс кыссьөмөн петісны враглөн траншеяө, кутісны кыйөдчыны. Дзик орччөн трачөдчис вражескөй пулемёт. Фашистскөй пулемётчик эз и кывлы, кыдзи бөрсяньыс сы дінө матыстчисны разведчикьяс, тупкисны вомсө да көрталісны ки-коксө. А кушөмкө минут-мөд мысти разведчикьяс вөліны нин «нейтральнөй» полосаын.

Тайө войся смел операцияыс муніс Орёл кар дорын 1942 воын, кор фашистскөй армия петіс Сталинград

дорын Волга вылө. Николай Ларуков сэки нин вөлі опытной воинөн. Война водзвылын Нившера сиктса зон муртса вевъяліс помавны среднёй школа да неуна уджыштны Локчим вылын кылөдчысьөн. Войналөн медводдза лунъясө сійө веськаліс военно-инженерной училищеё, но помавны эз вевъяв — ковмис мунны фронт вылө рядөвой сапёрөн. Тадзи корис Рөдина тайö сьөкыд кадö.

Коми зонлы миян командование кутіс сетны пыр кывкутанаджык да сложнойджык боевой заданиеяс. Сійө эз вермы вөчны сөмын отитор — ошыбитчыны. Од сапёр ошыбитчылө сөмын отчид. Быд ошыбка сулалө сылөн олөм доныс.

...Неруч ю дорын советской воиньяслы эз сет водзö мунны фашистьяслөн дот, кытчö вөлі сувтөдома пулеметьяс. Бара сетісны задание старшой сержант Николай Ларуковлы — бырөдны тайö дотсö. Кокни шуны бырөдны, а кыдзи сійөс вөчны?

— Боевой задание зэв сьөкыд, — висьталіс аслас отделениеса сапёрьяслы Ларуков. — Быдөнны ковмас нуны пуд тол. Задание вылө петам рытсыныс. Лөсьөдчөй.

Мыйөн пемдыштіс, сапёрьяс сьөкыд нопьясөн петісны туйö. Водзын кыссис старшой сержант Ларуков. Тадзи муніс час, мөд... Некод эз лысът куритчыны ни сёрнитны. Весиг öти кызөктөм вермис торкны став операциясö. А фашистьяс резісны пулеметьясысь да минометьясысь став оборона пасьта. Колö вөлі мунны зэв виччысьөмөн.

Вой шөр гөгөр сапёрьяс воисны фашистской дот дорөдз. Кутісны кывзысьны: пытшкас сёрнитісны фашистьяс. Ларуков вашнитіс ёртьясыслы, медым кодйысисны дот улö. Немецьяс ныр улын найö уджалісны зыръясөн быдса час. Кор дот стен бокрын гу лои кодйөма, Ларуков сетіс команда гусьоникөн кыссьыны бөр, а ачыс пукталіс толөвой шашкаяссö гүө да нюжөдіс

бикфордов шнур. Со и медбөръя здук. Шынельнас вевттысьомён сійö өзтис истог да чуткис шнура...

Ыджыд вына взрыв косьобтис войся пемыдас — дот кыпалис сынөдö. Фашистьяс восьтисны чорыд миномётно-пулемётной би. Но сапёръяс вöлины ылынöсь нин.

Старшой сержант Ларуков аслас боевой ёртъяскöд вуджöдчисны понтонъясөн Сож, Десна, Днепр, Висла, Одер юяс вылын. Быд татшöм операцияыс — подвиг. Öд понтонъяссö колö вöли новлөдлыны противниклөн чорыд би улын, сэк жö дугдывтөг найöс бомбитисны.

Ларуковлөн паметъысь некор оз вушйыны Висла сайса тышъяс, кодъяс пансисны 1944 вося августын. Юсайса плацдарм босьтны медводзөн вуджисны войнас нелямын боец, на лыдын и Ларуков. Найö атакуйтисны фашистьясöс нем виччысьтөг да босьтисны неыджыд участок. Но гитлеровецъяс пуктисны став вынъяссö, зилисны бөр шыбитны ю сайö советской воиньясöс. Лунтырөн найö дас куимысь уськөдчылисны контратакаö, лыйлисны пулеметьясысь, минометьясысь, бомбитисны сынөдсянь. Советской воиньяс лыдысь унаён усины.

Ларуков вевъялис тані сулавны пулемёт дорын, пуктавны минаяс асланыс окопъяс водзö. На вылын и взорвитчисны фашистской танкъяс. Сійö котралис чорыд би пытшкын, но весиг öти осколок эз инмы сылы.

— Тэ, другö, шуда! — шмонитисны салдатъяс.

Сэсся бара тышъяс. Варшава, Познань, немецкой карьяс... Тадзи Николай Ларуков воис Берлинöдз — фашистьяслөн позйөдз. Тайö ыджыд карсö босьтигөн сійö взорвитис некумын керка, көні водзсасисны фашистьяс, да буретш тайөн восьтис туй советской воиньяслы. Помаліс сійö ассыс кузь боевой туйсö Эльба дорын.

Дас правительственной награда öні дзирдалö сы морос вылын: первой степеня Отечественной война кык орден, мөд степеня Отечественной война, кык Красной Звезда орденъяс, «За отвагу» да мукöд медальяс.

ПАРТИЗАНСКОЙ ОРДЫМЪАСОД

Уна славной лист бок Великой Отечественной войны-лөн историяё гижисны Черниговщинаса партизаньяс. На повстын вөлі и Усть-Вымской районуьс Гам сиктса зон Александр Павлович Туркин.

* * *

Вөлі 1941 вося август. Березина ю дорын пансисны советской воиньяслөн немецко-фашистской захватчикьяскөд сьокыд, вир кисьтана тышьяс.

Березина дорын өти артиллерийской полк кутіс обора быдса сизим лун да вой. Но выньяс эз вөвны өткодьясь. Гитлеровецьяс кытшовтісны повтөм артиллеристьясөс флангьяссияныс. Артиллеристьяс повстысь, коді коли ловйөн, өтикөн-өтикөн кутісны бөрынтьчыны ас йөз дорө.

Батареяса связаной Александр Туркин аслас некимын ёрткөд бөрынтьчигас друг веськаліс фашистьяслөн засадаө. Сійөс босьтісны пленө. Сэсса лун и вой мукөд пленной красноармеецьяскөд тшөтш вөтлісны туй куза Ромодановской концлагерө. Гитлеровецьяс эз сетлыны сёйны ни юны. А кодкө кө усьлі кок йывсьыс либө петліс колоннаысь, пыр жө лыйлісны.

Туяс Туркин төдмасис өти пехотной лейтенанткөд.

— Пышьям,— вашнитіс Туркин выль ёртыслы,— мөд ног фашистьяслөн гыж улысь ловйөн мянлы не петны.

— А кыдзи пышьям?— шензьыны кутіс мөдыс.— Аддзан, кымын охранникыс!

Туркин висьталіс ёртыслы пышйом кузя аслас мөвп йылысь. Сійö вöлі татшөм. Войнас, кор охранникъяс оз лоны матынöсь, найö друг шыбитчасны туйбокса кутшөмкө гуранö, сэсся тадзикөн колясны пленнöйяс колоннаысь.

Лейтенант ошкис тайö плансö.

Налөн ставыс артмис сідзи, кызди вöлі мөвпыштöма. Охранникъяс эз и казавлыны налысь куйлөмсö.

Кык друг лоины вöля вылынöсь. Но кодарлань мунны? Первойсö некымын вой чöж боқысса местаясöд мунісны Харьковлань, но фронт некөн эз тыдав. Сэсся туй визьсö найö босьтісны войвывлань — смоленскöй вөръяслань. Сэк нин вöлі кывсьö, быттьökö сэнi тышкасьöны партизанскöй отрядъяс. Дерт, мунны лои зэв виччысьöмөн. Гитлеровецьяслөн быдлаын сулалісны карательнöй отрядъяс, налы отсасис предательясысь котыртөм полиция.

Дыр кад чöж тшыг нисьö пөт ветлігөн Александр Туркин зэв сьöкыда висьмис. Водзö мунны сэсся сійö эз вермы. Лои вöзйысьны öти сиктса йöз ордö. Бур, мый веськалісны шань сьөлöма войтыр.

Пöшти кык вежон чöж Туркин оліс Украинаса крестьяна ордын, бурдöдчис да чукөртіс вынъяс. А мыйён сувтіс кок йылас, бара петіс туйö.

Öтилаын Александр друг паныдасис сэтшөм жö морткөд, кызди и ачыс. Сійö сідз жö корсис партизанъясöс.

— Ме кывлі, мый öти сиктö частö волöны партизанъяс,— шуис Николай (сідзи шуисны выль другсö),— миянлы сэтчö колö веськөдчыны.

Найö сідз и вöчисны. Мунісны сикт дорö да кутісны виччысьны. Сиктö эз пырны, көть сэнi немецъяс эз вöвны. Рыланьыс нин на дорö вөрысь петісны кык морт, гражданскöй паськөмаöсь, но боканыс öшалісны автоматъяс. Позьö вöлі веськыда шуны, мый тайö партизанъяс. Немецьяс да полицейскöйяс öти-кыкөн ветлыны

эз лысьтлыны. Александр да Николай пыр жö матыст-
чисны на дорö да висьтасисны, кодьяс найö.

— Сідз,— нюмуніс öти партизанис.— Но ми тїянöс
сідзи огö вермö босьтны. Ковмас медводз асьнытö
петкöдлыны, мый вылö тї туянныд.

— А мый миянлы колö вöчны?— юаліс Туркин.

— Öти сиктын миянлы колö бырöдны старöстаöс.
Нартитчö йöз вылас лёк зверь моз. Штабсянь эм нин
сы кузя индöд. Со тїянлы и медводдза боевöй задание.
Сы бöрын вермам нуöдны сёрни отрядö примитöм
йылысь,— шуис партизан.

— Ми дасьöсь пöртны олöмö быдсяма задание-
сö!— пöшти öтпырйö шуисны другьяс.

Александрлы да Николайлы сэк жö партизаньяс се-
тїсны обрез, кодöс вöлі позьö дзевны паськөм улö.

Индөм сиктö найö воисны рытнас. Старöста шойччис
нин гортас. Медым пырны сы ордö, найö думыштїсны
помка, быттьö налы колö босьтны господин старöста-
сянь сиктын узьöм вылö кабала. Татшöмөсь вöліны выль
законьясыс, кодьясöс лосьöдісны фашистьяс.

— Весасьöй керкасыс!— ырöстїс старöста на вылö,
кор сöмын на тувчисны порог вомöныс. Но фашист-
скöй понлы пыр жö лои ланьтны: сы вылö вöлі весь-
кöдöма обрезлысь бугыльсö.

— Смерть предательяслы!— пыр жö гымыштїс
луйöм шы, и старöста пластасис джоджö...

Тадзи Александр Туркин веськаліс С. М. Киров нима
Злынковскöй партизанскöй отрядö, кодөн командуйтїс
Д. П. Забницкий. Тайö отрядыс пырис партизанскöй со-
единениеö, кöні командующöйнас вöлі А. Ф. Фёдоров.

Уна операциясын ковмис участвуйтны Алек-
сандр Туркинлы. Сійö ветлөдліс диверсияяс вылö, пу-
кавліс засадаясын, тышкасис гитлеровскöй карательяс-
көд да полициякөд.

Отчыд партизаньяслы сетїсны боевöй задание —
жугöдны спирто-водочнöй завод, кодї лыддысис воен-

нӧй объектӧн. Заводсӧ ёна видзисны, да партизанъяслы лои лӧсьӧдчыны ставсӧ бура артыштӧмӧн.

Партизанъяслӧн тайӧ группаас пырис и Александр Туркинлӧн пулемётной отделениеыс. Сылы сетисны задание — сувтӧдны пулеметьяссӧ фашистской охранникъяслӧн казармаяс дорӧ да тревога дырйи не лӧдзны петны ни ӧти салдатӧс.

Боевой операция пансис асья войнас. Сийӧ заводитчис гӧрд ракета лыйӧмсянь. И пансис завод гӧгӧр вӧвлытӧм тыш. Александр Туркин котраліс ӧти пулеметчиксянь мӧд дорӧ, индаліс кытчӧ колӧ лыйлынысӧ.

Операция помасис успешнойя. Завод вӧлі взорвитӧма. Сӧмын казармаяс дінын Туркинлӧн пулеметьясыс уськӧдісны некымын дас гитлеровецӧс. Вӧлі мездӧма сизимдас гӧгӧр советской военнопленнойӧс, кодьясӧс фашистьяс уджӧдісны заводас катарга вылын моз.

Александр Туркинлӧн партизанской олӧмысь позьӧ индыны уна интересной боевой подвигьяс. Вайӧдам сӧмын сылӧн наградной листысь гижӧдсӧ, коді видзсьӧ Украинской ССР-са Верховной Совет Президиумын:

«Партизанской отрядын олӧгӧн,— индысьсӧ тайӧ документас,— Александр Павлович Туркин участвуйтіс 39 бойын, ачыс бырӧдіс 67 фашистӧс. Мукӧд партизаньяскӧд тшӧтш сийӧ бырӧдіс 8 вражеской железнодорожной эшелон, уна автомашина.

Рядовой боецянь сийӧ быдмис ротаса командирӧдз.

Боясын асьсӧ петкӧдліс збойӧн, повтӧмӧн, требовательнойӧн. Съӧкыд минутьясӧ аслас примерӧн сийӧ ышӧдіс партизаньясӧс вражкӧд миритчытӧм тыш вылӧ...»

А со письмӧыс Киров нима партизанской отрядас вӧвлӧм командир Дмитрий Петрович Забницкийсянь.

«Сашаӧс ми ставным радейтӧм, кызди боевой командирӧс. Онӧдз ми лыддылім сийӧс фронт вылын усьӧмьяс лыдын. Сийӧ ловья! Оз эскыссы. Ми онӧдз огӧ тӧдӧй, кызди сийӧ помаліс войнасӧ...»

Онӧ вӧвлӧм партизан олӧ да уджалӧ Сыктывкарын.

ЗАРНИ КНЯС

Сулаліс 1941 вося ноябрь. Арктикасянь пöльтіс кöдзыд вой тöv. Топыда нин вöлі дорöма йиön юяс да тыяс. Пуксис кузь тöv.

Архангельсксянь Вологдаö тövзисны воинскöй эшелоньяс. Теплушка-вагоньясын фронт вылö муніс вильысь формируйтöм 32-öд стрелкövöй бригада. Быд станцияын боецьясöс колльöдісны уна йöз. «Чорыда нöйтöй фашистскöй вөрөгьясöс!»— синьяснысö чышкалöмön шуалісны нывбабаяс.

Сöветскöй страналы тайö вöлі медся сьöкыд кад. Гитлеровскöй ордаяс саранча моз матыстчисны Москва дорö, орöдісны туйяс Ленинградö, ыджыдалісны Украинаса да Белоруссияса карьясын. Рöдина весьтын öшйис фашистскöй палачлön вирöсь черыс.

Пульманскöй вагонын муніс и бригадаса санитарнöй рота став эмбурнас—палаткаясön, инструментьясön, медикаментьясön. Медикьяс пövстын вöлі и старшöй операционнöй сестра, кызь квайт арöса фельдшер Агния Андреевна Шулепова. Сійö мövпаліс вокьяс да верöс йывсьыс, кодьяс вöліны нин фронт вылынöсь. Ловьяöсь-ö найö?

— Мый нö сэтшöм жугыль, Ага?—шыасис сы дінö главнöй хирург Захар Семёнович Колесников.

— Вот мövпала, кытчö мянöс нуасны,—медым сöмын öвсьыны хирургысь, вочавидзис Шулепова.

Тайö юалöм вылас вочавидзны эшелонын некод эз вермы. Сійö тöдса вöлі сöмын высшöй командованиелы.

Агния Андреевна бара тырис аслас думьясön. Быт-

тьо со öнi на помалiс Сыктывкарса медицинскöй техникум, а сэсянь коли нин көкъямыс во. Кык во уджалiс фельдшерөн Туръя сиктын, а сэсса Нювчимса больничайн. Танi жö аддзис ассыс шудсö — мунiс верöс сайö учитель Виталий Степанович Шулепов сайö. Мövпалiс на сöмын овны и — война...

Вологдасянь эшелонöс мöдöдiсны рытиввылö, Ленинградлань. Сэки быдөнлы лои гөгөрвоана, кутшöм фронт вылö найö мунöны. А Ленинградскöй фронт вывсянь юөръяс воисны эз радланаöсь. Фашистскöй полчищеяс пыр зыртчисны и зыртчисны.

32-öд бригада веськалiс Волховскöй фронт вылö. Тайö вöли войналөн зэв сьöкыд участок, торйөн нин наступайтöм вылö. Гөгөр юяс, кынмывлытöм нюръяс, вөр. Весиг оз позь вöли кодйыны окопьяс.

Санитарнöй рота пуктiс палаткаяссö неылын передöвойсянь. Сэтчö жö сувтöдiсны операционнöй пызанъяс. А хирургьяслы уджтөг эз ковмы овны ни öти лун. Чорыд бойяс заводитчисны фронт вылö воöмсянь медводдза луньяссиянь. Фашистьяс дугдывтөг бомбитiсны да лыйлiсны артиллерияысь да миномётъясысь. Бомбаяс да минаяс веськавлiсны и санитарнöй палаткаясö. Агния Андреевнаны эз сюрлы шойччыны некымын сутки чöж. Сийö пыр отсалiс хирургьяслы вöчавны операцияс. Сийöс пыр корлiсны медся сложнöй операцияс



А. А. Шулепова.

вылө. Сыысь бурджыка тані некод эз кужлы сетны нар-
коз. «Зарни кияса сестра»—тадзи нимтылісны сійос
врачьяс.

— Кад тэныд шойччыштны, Ага,— кор аддзылісны,
мый Шулепова мудзёмысла да узьтёмысла өдва нин
кок йылас сулалө.

— Кызди ме верма шойччыны, кор колө спасайтны
йөзөс?— вочавидзліс Агния Андреевна.

Кызкө өти операция вөчигөн дзик палатка дорын
взорвитчис вражескөй мина. Агния Андреевна ранит-
чис, но сэни жө и асьсө ачыс көрталіс бинтөн да, кызди
бытьтө немтор эз вөвлы, водзө кутіс уджавны.

— Тэнад и нервьясыд көртөсь,— шуис хирург,—
сьөлөмыд мужичөйлөн коды!

Но Агния Андреевна вөлі сэтшөм жө нывбаба, ку-
тшөмөсь ставыс. Сійө кужис шогсьыны и радлыны, ра-
дейтны и бөрдны. Отчид операция вылө вайисны мо-
рөсас зэв сьөкыда ранитчөм мортөс. Шулепова видзөд-
ліс сылы чужөмас да дзикөдз кельдөдіс, сэсся друг уси
садьтөгыс. «Мыйысь тэ, Ага, сідзсө повзин?»— бөрвылас
юалісны сылысь. «Ме думайті, мый сійө менам во-
көй...»— шуис Агния Андреевна.

1942 вося гожөмнас вир кисьтана тышъяс фашист-
скөй захватчикьяскөд пансисны Синявинскөй высотаяс
вылын, кодьясөс гитлеровецьяс вөчисны асланыс кре-
постьө. И тані Агния Андреевна пыр вөлі передөвөй
позицияяс вылын. Суткияс чөж эз вешйив ранитчөм со-
ветскөй воиньяс дорысь. Унаысь лои ветлывлыны и кыс-
кавны раненөйясөс бой мунан местаясысь. Ветлөдліс
санитарнөй сумкаөн ружейно-миномётнөй би улын.

— Сестричка, виччысьөмөнджык!— горөдлісны сы-
лы боецьяс.

— Немтор, менө пуля оз босьт!— шуткаөн воча-
видзліс Шулепова.

Синявино дорын бойяс дугөдөм бөрын Агния Андре-
евналысь частьсө вуджөдісны тылө, сэсся сійө веськаліс

183-өд дивизияса медсанбатө бара жө операцияннөй сестраөн. Тані главнөй хирургнас вөлі зэв бур сьөлөма нывбаба Вера Иосифовна Лучко, кодкөд медводдза лунсяныс жө заводитчис зэв бур дружба.

— Тэ көть, Агаш, фельдшер, но киясыд да вежөрүд врачлөн,— частө шулывліс Вера Иосифовна да сетлывліс вөчны сэтшөм кыв кутана операцияс, кодъясөс эз лысытлы сетны дипломированнөй хирургъяслы.

Аслас дивизиякөд Агния Андреевна муніс кузь боевөй туй. Сійө участвуйтис Украинаса каръяс мездөмын, муніс Польша да Чехословакия пыр, воліс Эльба вылөдз.

Збой коми нывбабалөн паметъысь некор оз вушйывлыны Харьков мездөм вөсна чорыд тышъяс. Бой мунан местаясын кольлісны уна сьөкыда ранитчөмъяс. Найөс петкөдлыны санитаръяс петавлісны войяснас. Частө накөд ветлывліс и Агния Андреевна да петкөдіс уна дас воинөс.

Сьөкыд висьтавыны, кымын сөветскөй мортлысь спаситісны олөмсө война чөжөн Агния Андреевналөн зарни киясыс. Татшөм арталөмъясыс эз вөвны. Тыдалө, тайө лыдпасыс воас уна тысячаөдз. Тайө и эм боевөй подвиг, кодөс пасйөма Краснөй Звезда орденөн да уна медальсөн.

И өні Агния Андреевна уджалө фельдшерөн. Сійө став сьөлөмсяныс төждысьө Вильгортса среднөй школаын велөдчысьяслөн здорөвье вөсна.

ДИВЕРСАНТ ЧЕЧЧЫШТИС ПАРАШЮТОҢ

Великӧй Отечественнӧй война дырйи коми йӧз пӧвстысь унаӧн участвуйтисны миян славнӧй разведка-ын. Найӧ пӧртисны олӧмӧ командованиельсь кыв кутана боевӧй заданиеяс. Тані висътавсьӧ Степан Иванович Пантелеевлӧн войнадырся боевӧй делӧяс йылысь.

* * *

1943 вося октябрь тӧлысьын батальоннӧй штабса писарь Степан Иванович Пантелеевӧс корисны армейскӧй штабӧ. «Мыйла тайӧ корӧны?»— мунігчӧжыс мӧвпаліс старшина.

— Ми тэнӧ, Пантелеев ёрт, кӧсьям ыстыны курсъяс вылӧ,— шуисны сылы штабын.— Боевӧй опыт тэнад эм — кык во нин фронт вылын. Коммунист, дисциплинированнӧй воин. Лоан тэ разведчикӧн. Сӧгласен?

Степан Иванович дыр мӧвпаліс. Сӧветскӧй разведчикъяс йылысь сійӧ сӧмын книгаясысь лыддывліс. Службаыс, дерт, интереснӧй, но и опаснӧй. Кызди вочавидзны юалӧм вылас? Тырмас-ӧ сылӧн сямлуныс?

— Ме дась мунны курсъяс вылӧ,— шуис старшина чорыда.

Ӧдйӧ колисны велӧдчан тӧлысьяс. 1944 вося апрельын курсъяс помасисны да сылы сетисны младшӧй лейтенантлысь воинскӧй звание. Ыстисны сійӧс служитны первой Прибалтийскӧй фронт вылӧ, индісны ӧти артиллерийскӧй частьӧ контрразведкаса работникӧн.

— Ни ӧти минут кежлӧ энӧ вунӧдӧй, младшӧй лейтенант ёрт: враг сюсь да мудер,— шуис сылы дивизия разведкаса начальник.— Сысянь позьӧ виччысьны быд-

сяма пакосьтсьо. Тянлы дөверяйтсьо зэв кыв кутана удж.

— Ме ставсьо бура гөгөрвоа,—вочавидзис Пантелеев,—и дась пöртны олөмө любöй боевöй задание.

Ассьыс сьöкыд уджсьо Степан Иванович заводитис йöзкөд төдмасьöмсянь. И первойсяньыс артиллеристьяс воисны сылы сьöлөм вылас. Тайö вöліны ветераньяс, кодьяс пасьвартисны фашистскöй захватчикьясöс Москва дорын и Курскöй дуга вылын, Смоленщинаын и Белоруссияын. На вылө позис надейтчыны любöй кадö. Öнi на водзын сулалис боевöй мог — мездыны фашистьясысь сöветскöй Прибалтика.

Öти водз асылö Степан Ивановичöс друг садьмөдiс полкса штабысь дежурнöй.

— Младшöй лейтенант ёрт,—висьталис дежурнöй,—миян артиллеристьяс казьявлöмаось, кыдзи асья войнас мулань лэччöма тасянь неылын кутшöмкө еджыд ёкмыль. А та водзвылын лэбзьöма фашистскöй самолёт. Эз-ö фрицьяс шыбитны кутшöмкө диверсантöс?

Пантелеев пырысь-пыр босьтис боецьяслысь неыджыд группа да котöртис индөм местаö. Вöлі нин югдандор. Частьыс сулалис ыджыдкодь вöрын, и фашист тани вермис бура дзэбсьыны. Колö вöлі нюжмасьтөг корсьны сійöс, бöрынджык лоö нин сёр. Гашкө, кутшöм ыджыд заданиеөн сійö локтис?

Быд боецлы Степан Иванович сетис торья участок, медым öтпырийö босьтны син улö чеччыштан местасö дзоньнас. Час-мөд корсьöм бöрын боецьяс аддзисны дзэбөм немецкöй парашют. Но ачыс вражескöй лазутчик некөн эз тыдав. Пантелеев мөдөдiс öти боецкөд парашютсö штабö, а мукөдьяскөд бара заводитис корсьны врагöс. Эз жö сійö вермы сывны?

А корсьысьöм водзвылын ещö штабсянь на Пантелеев юөртис войся «гöсть» йылысь орччөн сулалысь частьясö, медым найö сiдз жö сувтөдiсны караульяс. Но фашистöс некөн эз казьявны. Дерт, сійö вöлі сöветскöй военнöй формаа.

Сөмын лун шөр гөгөр Пантелеевлы юөртисны телефон пыр өти частьсянь, мый сэни кутисны өти подозрительной лейтенантос, кодй быттьо кө мунө фронт вылө госпитальсянь. Пантелеев пырысь-пыр мунис машинаон тайө частяс. Но сэтчө воөма нин дивизияса работник.

— Молодеч, Степан Иванович!— ошкис сийө Пантелеевос.— Советской лейтенант паськома морт збыльсь вөлөма вражеской диверсантон. Мераяс өдийө примитомысь сета благодарность. Но, а кони парашютыс?

— Пыр лоө вайөма,— вочавидзис Пантелеев да звөнитлис телефон пыр аслас частьө. А регыд сылы юөртисны сидз жө телефон пыр, мый парашютсө боецьяс косявлөмаось нямөдъяс вылө. Степан Ивановичлөн юрсиыс сувтлис, но начальниклы ковмис доложитны.

— Кыдзи нө сийө вермис лоны?— шензис начальник.

— Ог вермы төдны,— шуис Пантелеев.

— Парашют косявлөмысь сета тэныд, младшой лейтенант өрт, выговор,— шуис начальник.

— Эм пөлучитны выговор!— көзырнитис Пантелеев.

Дыр тайө лоөмторйыс эз вун Пантелеевлөн.

Ыджыд удж Степан Ивановичлы ковмис нуөдны Литваса айсаргьяскөд тышын. Найө — литовской помещикьяслөн, кулакьяслөн да мукөд озыр йөзлөн пияныс — вөліны народлөн медлөк врагьясөн. Вооружитчөм бандитьяс фашистской оккупация дырйи виалисны мирной йөзөс да советской военнопленнойясөс. А кор гитлеровецьяс кутисны бөрынтьчыны Литваысь, найө кольччисны гусьон Советской Армиялөн тылө, медым пельос сайсянь лыйлыны активистьясөс да советской воиньясөс. Айсаргьясөс кутавны эз вөв кокни. Бандитьяс лыйсылисны медбөрря патронөдз. Унаысь ташөм тышас лейтенант Пантелеевлы өдва удайтчылис кольны ловйөн...

Прилузской районысь Гостиногорка сиктса крестьянлөн пи, сийө пунктис асьыс пай Отечественной война дырйи враг вылын победаө.

ВУДЖАНИН КОРСИГӨН

44-өд механизированной бригадын не этша вöлины повтöм да опытной командирьяс. Но бригада штабса начальникöс вежысь майор Ян Андреевич Северныйöс лыддылисны повтöмьясысь повтöмөн. Сы вöсна, гашкö, сийö и öдийö кыптіс служба кузяыс.

Ян Андреевич эз вöv кадрöвöй офицерөн. Профессия сертыс сийö вöлі лесоводөн, помавліс сельхозтехникумысь лесоводческой отделение. Уджавліс уна во Коми республикаса вөрьясын. Сöмын действительной служба вылас помавліс курсьяс да сылы сетлісны запасын взводса командирлысь воинской звание. 1938 воын сийöс бара призывайтöны служитны Коми республиканской военкоматö. 1942 вося гожöмын тасянь сийö веськаліс «Выстрел» курсьяс вылö, а сэсся — Брянской фронт вылö. Индісны противотанкöвöй ротаса командирöс вежысьөн. Регыд сылысь частьö вуджöдісны Сталинградской фронт вылö.

И кор 1942 вося ноябрын заводитчис Отечественной войнаса великöй битва Сталинград дорын, Ян Андреевич аслас ротанас мездіс не öти населённой пункт. Сийö медводзөн пырис Перелазовской хуторö, көні сулалісны кызь гөгөр фашистской танк. Уськөдчöмыс вöлі сэтшöм нем виччысьтöмөн гитлеровецьяслы, мый налөн став боевöй машинаыс веськаліс советской воиньяс киö дзоньөн. Суровикино көрт туй станция вöсна тышын старшöй лейтенант Северный ранитчыліс кокас осколокьясөн, но эз мун весиг госпитальö.

— Лоны тэныд, Ян Андреевич, генералөн,— шутка-

өн моз шуис сэки батальонной командир.— Тэнад воен-
ной талант...

— Омоль сэтшөм салдатыс, коді оз мөвпав лоны
маршалон!— воча нюммуни Северный.



Я. А. Северный.

Войналон эмось аслыс-
пөлөс законьяс. Оти морт
сэни абу воин, кызди шулө-
маось важ йөз. Мукөд сал-
датыс усь медводдза бойө
петигон, весиг отчид оз
вевьяв лыйны, а мукөдыс
война чөжыс передөвөй-
ынось и ни отчид оз ранит-
чывны, либө ранитчасны
кө, кокниа. Татшөм войтыр-
ыслы прөстөя кө шуны «ве-
зитө». Татшөм воиньяс лы-
дө и пырліс Ян Андреевич
Северный.

Верхне-Чирская көрт
туй станция вөсна тышын
противник контратакуйтис
советской воиньясөс быдса
куим лун, дугдывтөг бом-
битис сынөдсянь. Кажитчис,

станцияын эз коль сэтшөм местаис, кытчө эськө эз ин-
мыв вражеской снаряд либө бомба. Батальон воштіс
джынсьыс унджык мортөс, ранитчөма вөлі и батальонса
командырыс. Капитан Северныйөс индісны командуйтны
батальоннас.

Кытчө сөмын эз шыблавлы Ян Андреевичөс сьөкыд
фронтөвөй туйыс! Вөвлі Спаськ-Демьянск вөсна тышьяс-
ын, Орловско-Курской дугаын, мездіс Белоруссияысь
да Литваысь уна карьяс. Оти кадө весиг индылісны За-
падной Двина вомон переправаса комендантон. Вось-
кавліс враглон кытшө — бөр петліс.

Но век жö война эм война!

...Тайö лои 1944 вося июльын. Майор Северный сэкинин служитис мотомеханизированной бригадаын штабса начальникöн. Сылөн частыс сöмын на мездис Литовской кар Панивежис да вöтлис гитлеровской захватчикьясöс ритыввывлань. Но немец пыр на кутчысис рубежсянь рубежö, весиг петавлис гырысь контратакаясö, кыдзи ранитчöм зверь.

Буретш сэки майор Северныйöс корис ас динас бригадаса командир.

— Миянлы сетисны приказ — водзö вöтöдны противникöс да не лэдзны сийöс укрепитчыны, — командир паськөдис карта. — Бригадалөн маршрут вылын со ю. Колö разведайтны, медым юсö форсируйтны нюжмасьтөг. Посьяс фашистьяс, дерт, көнкө, взорвитисны. Ковмас корсьны уян места. Гөгөрвоана могыс?

— Так точно! — кöзырнитис майор.

— Задание зэв кыв кутана, сы вöсна сийöс ме поручайта тiянлы. Босьтöй автомашина, автоматчикьясöс — и туйö. Лоöй сюсьөн. Врагысь позьö виччысьны быдтор.

— Ставыс гөгөрвоана!

Ян Андреевич босьтис сизим автоматчикöс да автомашина вылын төвзис юлань. Вöли сэтшöм лöнь, быттö войнаыс эз мун матигөгöрын. Но майор төдис, мый фашистьяс мудерöсь. Найö вермисны кольны бöрынътчан туй вылас засадаяс. Колö вöли кутны синьяс да пельяс сюсьөн.

Со и ю, кодöс вöли индöма карта вылын. Берег дорö вотодз Северный чеччөдис автоматчикьясöс машинаысь да, кустьяс сайö дзевсясьöмөн, локтис ю дорö. Сийö думайтис, мый немецьяс босьтисны оборонасö ю сайын. Но противник некөн эз тыдав.

— Фрицьяс ылөджык нин пышйöмаöсь! — серөктис öти автоматчик.

— Мед пышйö, — шуис майор, — ми сийöс век жö суöдам, кöть Берлинөдз мунас.

Разведчикъяс бара пукисны автомашинао да берег пөлөн мөдөдчисны водзө, медым аддзыны войскалы вуджан места. Абу паськыд юыс, но сы вомөн вуджны боевой машинаяслы, артиллериялы абу кокни.

— Со неылын тыдалө кутшөмкө пос!— горөдiс өти автоматчик.

Да, ю увланын збыльвылө тыдалiс пос. Но кор сы дiнө матыстчисны разведчикъяс, аддзисны, мый сiйөс вөли сотөмаось. Дзоньтавны кө, ковмас уна кад да материал. А противникөс вөтөдiгөн дона быд минут.

— Ещө водзө ветлам,— шуис майор, и автомашина бара кутiс жуньгыны берег пөлөн, кустъяс бокөд кытш-лалiгтырйи. Корсюрө Ян Андреевич сувтөдлiс машина-сө да чеччылис, медым видлавны, абу-ө кутшөмкө ляпкыд места.

— Аддза выль пос, майор ёрт!— бара шыасис разведчикъясысь өти.

— Правильнө — пос!— видзөдлiс Северный бинокль пыр да сетiс команда мунны сэтчө.

Тайө поскыс, вөлөмкө, дзик дзонь да зэв ён. Разведчикъяс сiйөс бура видлалiсны, эз-ө фашистьяс сiйөс минируютны. Но минаяс эз тыдавны.

— Тыдалө, взорвитныс абу весиг вевъялөмаось!— нюммунiс майор.— А поссө ковмас медводзөн видлыны миянлы. Машинао, ёртъяс!

Кокныдiк осьса автомашина өти здукөн төвзыштiс пос кузя ю мөдар берегө. Öнi позис нин бергөдчыны бөр да юөртны командованиелы та йылысь. Но майор Северный решитiс ветлыны ещө водзөджык, медым бура төдмавны, мый опасностьыс водзын абу. Туйыс мунiс эрд вывтi, отар-мөдар бокас розъялис морт судта сю.

И друг советскöй воиньяслөн дзик ныр улын, быттьө чужисны мусьыс, петкөдчисны немецкöй окопъяс. Машинасянь некымын оськов сайын пукалисны пулемөт.

дорын кык гитлеровец. Ставыс лои сэтшөм өдйө да виччысьтөмөн, мый немецъяс шөйөвошины. Сувтөдны лои и машина.

— Сю пытшкө, бөрө!— горөдіс майор машинаыс чечыштигмозыс, сэк жө сетіс немецкөй пулемётчык-яс кузя автоматыс өчередь, сэсся лажынтьчөмөн да чукльөдлөмөн котөртіс сю пытшти. Таркакывны кутісны гитлеровецьяслөн автоматъяс да пулеметьяс. Но найө өні лыйсисны сьөдас.

Сөмын кө өти здук сөрмөдчис Ян Андреевич да эз петкөдлы повтөмлун, дерт, веськаліс эськө фашистьяс киө. Но радлыны, вөлөмкө, водз на. Мыйөн сөмын сійө ылыстчис окопъясыс, сю пытшкын бара сувтісны сы водзө некымын гитлеровец. Дыр мөвпавны сідз жө вөлі некор. Немецьяс кузя сійө лыйліс автоматыс став дисксө да, бокөджык кежөмөн, чепөсйис юлань. Сэк жө сылөн морөс пырыс ёнтыштіс вражескөй пуля. Майор кутіс ойдны вирөн, но пөсьыввьыс ещө на неуна котөртіс да уси туй дорө. Видзөдліс бөрө: сы дінө матыстчө винтовкаа гитлеровец... И кытыс сөмын чужисны тайө здукас Ян Андреевичлөн вынъясыс! Сійө вевъяліс на кыскыны пистолетсө да некымыныс лыйны вөтчыс фашисты. А сэсся кутіс кызны танкъяслөн шы. Тайө вуджисны пос вомөн советскөй танкъяс.

...Вөвлөм повтөм воин Ян Андреевичкөд ми пукалам сылөн Сыктывкарса керкаас да казъылам Отечественнөй войнадырся чорыд тышъяс. Юрсиыс сылөн лым кодъ нин еджыд, но чужөм серти сьөкыд на сетны квайтымын арөссө.

— Мда,— ышловзис сійө.— Госпитальө сэки менө нуисны танкистьяс. И коли ловйөн. Сэсся уджавлі бара военкоматын, судоремонтнөй заводуын. А өні пенсия вылын.

СЬӨКЫД ЛУН

Лөсьыдось Украинаын гоҗся войяс. Гөгөр лөнъ. Небесаын дзирдалоны югыд кодзувъяс. Фруктовой садъяс да степ өвтөны чөскыд ароматон. А конкө матысса сиктын кылө том йөзлөн гажа сьылөмыс.

Лейтенант Казаринов пукаліс полкса штаблөн восьья өшинь дорын да нимкодясис мича поводдянас. Талун сійө вөлі частьса дежурнойон, сулаліс кывкутана пост вылын. Медым өдйөджык муніс кадыс, сійө частө звөнитлывліс батальонъясө дежурнойяслы, юасис.

— Ставыс бур,— докладывайтісны найө.

Асьявылыс нин, нельөд часын, Казаринов бара муніс видлавны караульяс. Первой воліс танкөвой паркө, сы бөрын — боеприпасъяс видзан складө, сэсса — ломтас да мавтас видзан складө. Быдлаын часөвойяс сулалісны сюся. Сідзкө, повны нинөмысь.

Лейтенант шутьялялігтырйи бөр локтіс штабө. Джын дежурствоыс сьлөн помассис. Рытнас сійө сдайтас дежурствосө мөдлы и позяс шойччыштны, ветлыны гөтырыскөд гуляйтыштны либө кино вылө. Но мый тайө? Юр весьтын зэв вылын друг кутіс жургыны самолёт, сійө муртса төдчыштіс чепөсйысь асья кыа югөръяс улас. Кутшөм тайө самолёт — асланыс али враглөн?..

Та бөрын коли ещө час кымын. Ёна нин югдіс. Лейтенант бара петіс штабысь ывлаө, лолыштны асья сөстөм сынөднас. Буретш сэки военной городок весьтын друг петкөдчис мяян «ястребок». Веськыда строевой плац вылө лётчыкыс шыбитіс кутшөмкө сьөд ёкмыль. Казаринов өдйө котөртіс сэтчө. Дерт, тайө вөлі кутшөм-

кө сигнал. Вөлөмкө, лётчыкыс шыбитөма ассыс шлемсө. А сы пытшкын гижөд: «Фашистскөй авиация быдларын бомбитө мянлысь аэродромьяс. Война!»

Оз позь вөлі воштыны ни өти минут. Казаринов котөрөн пырис штабө да юөр-тис лётчиклөн гижөд йылысь дивизияса дежурнөйлы.

— Кыпөдөй полксө боевөй тревога серти!— шуис полкса командир.

Тадзи заводитчис войнаыс Николай Иванович Казариновлы. Чужлис да быдмылис сийө Аныбын, сэсса 1938 воө помалис Сыктывкарса лесрабфак. Көсйис мунны велөдчыны институтө. Но сийөс босьтисны Орловскөй бронетанкөвөй училищеө да лои танкөвөй взводса командирөн. Сылөн частьыс сулалис Львов жарсянь войвылынджык, эз нин зэв ылын границасянь.

Боевөй тревога йөзөдөмсянь час бөрын нин танкөвөй полк сулалис индөм местаын, военнөй городоксянь 10 километр сайын. Лейтенант Казариновлы козмис пуксыны танк пытшкас веськыда дежурство вывсянь параднөй форманас, весиг эз вермы аддзөдлыны гөтырсө — эз тырмы кадыс. Сылөн взводын вөлі вит БТ-7 өдйө ветлысь танк.

Бакьяс тырвөйө заправитөм бөрын танкөвөй колоннаяс бара мөдөдчисны водзө границалань, Лопатин местечколань. Пукалис зэв мича шондја асыв. Мый вөлі водзын, танкистьяс пытшкысь некод немтор эз төд. Кутшөм фашистьяслөн вынъясыс, вооружениеыс?



Н. И. Казаринов.

Туй вылас нин сѳветскѳй танкистѳяс вылѳ нем вичысьтѳг уськѳдчисны пикируйтѳсь «юнкерсьяс»— гашкѳ, сѳ сайѳ самолѳт. Гырысь бомбаяслѳн взрывѳясысь сыркъяліс став муыс, потласис сынѳдыс. Казаринов медводдзаысь аддзис щельяс пыр, кыдзи сы водзвылын и бокѳясын сотчисны первой сѳветскѳй танкъяс, пѳгибайтѳсны сылѳн боевѳй ѳртѳясыс. Тайѳ вѳлі первой боевѳй крещение.

— Водзѳ!— пиньяссѳ курччалѳмѳн сійѳ командуйтѳс механик-водительпы.

— Со войнаыд кутшѳм!— шуис батальонса командир, кодѳ сѳдз жѳ пуксис Казариновлѳн танк пытшкѳ.— Ок, тышѳяс лѳѳны чорыдѳсь!

— Сѳтшѳм нин миян судьба — медводзѳн лѳи петны тыш вылѳ,— вочавидзис Казаринов.— Кувны кѳ и кувны. Рѳдина вѳсна!..

Недыр мысти танкъяс петѳсны неыджыд рас бокѳ. Туй вылас налы некод сѳдз эз и паныдасылы. Тыдалѳ, водзын миян частѳяс эз вѳвны, а фашистѳяс матыистчынысѳ эз на вевѳявны. А гашкѳ, найѳ мунѳны мѳд туй кузя да кѳсйѳны пырны полклѳн тылѳ? Ставыс вѳлі тѳдтѳм.

Лейтенант Казаринов сюся видзѳдѳс орудийнѳй прицел пырыс водзѳ. И друг неылын кустѳяс сайын кутѳсны тыдавны кутшѳмкѳ каскаа, виж паськѳма йѳз, паськыд гѳленя сапѳгаѳсь.

— Кутшѳм тайѳ йѳз?— шензис лейтенант.

— Тайѳ жѳ немецѳяс!— горѳдѳс батальонса командир. Враглѳн матыистчѳм йылысь вѳлі доложитѳма рация пыр полкса командованиелы.

— Атакуйтны противникѳс!— воис приказ.— Бырѳдны сійѳс биѳн да гусеницаясѳн!

Ыджыд тѳв ныр моз сѳветскѳй танкистѳяс петѳсны сѳд лавинаѳн враг вылѳ, мунѳгмозыс восьтѳсны би пушкаясысь да пулемѳтъясысь. Налѳн гусеницаяс улын тѳралѳс став муыс.

Медводдза атака! Медводдза бой! Куим во лейте-

нант Казаринов велөдіс военнөй наука, бура төдмасис вынйөра боевөй техникаөн. Коді өні лоө өнджыкөн, сійө али враг? Николай Иванович видзөдліс щельяс пыр аслас боевөй ёртъяс вылө. Танкъяс мунісны паськыд фронтөн, дружнөя. Мед видлас враг сувтөдны найөс! Лейтенант Казариновлөн кытчөкө быттьө друг воши полөмыс, коді кыптыліс медводдза здукнас. Сійө быттьө эз мун, а лэбис стальнөй машинаөн враг вылө.

— Водзө!— командуйтис сійө.

Чорыд артиллерийскөй да миномётнөй би восьтісны и гитлеровецъяс. Заводитчис вөвлытөм тыш. Взрывъяс-ысь, лыйсьөмысь, мотор шыясысь сыркъяліс весиг став сынөдыс, тырис тшынөн да бусөн. Ыпъялөмөн сотчисны танкъяс. А бой өддзис и өддзис пыр ыджыдджык вынөн.

Лейтенант Казаринов сюся корсис цельяс. Со өти пу дорын югнитлывліс вражескөй пушкालөн биыс. Некемын снаряд — и вражескөй орудие ланьтис... Казаринов лыйсис и лыйсис, мый вермис бырөдаліс фашистьяс-лысь ловъя вын да техника. Лунтыр сійө нинөм эз сөйлы; жарысь да горш косьмөмысь потласисны вом доръясыс. Но тайөс ставсө лейтенант эз чувствуйт. «Пөлучит, гад!»— пушкаысь быд лыйөм бөрын парсө курччаліс Казаринов.

Час гөгөр муніс тайө чорыд бойыс советскөй танкистьяслөн противник авангардкөд. И победительөн тані петісны Краснөй Армияса воинъяс. Гитлеровецъяс-лы лои бөрынтьчыны. Бой местаө найө колисны уна сө салдат да офицерлысь шойсө. Налы вөлі сетөма чорыд урок. Дерт, ыджыд воштөмъяс лоины и танкистьяслөн — петіс стройысь боевөй машинаяслөн коймөд юкөныс кымын.

Сэсса воис приказ — бөр бөрынтьчыны раскө, кыгысянь танкистьяс петісны атакаө. Восьса местаын маскируйтчыны вөлі сьөкыд, а фашистскөй авиация вермис

уськөдчыны быд минутö. Позис виччысьны и противник-
лөн танкъяслысь контратака.

...Лунвывса югыд шондыс öдйö уськөдчис вöртас сайö, да кутис пемдыны. Сынöдыс öвтис тшын дукөн. Öтилаын и мөдлаын ыпъялісны пöжаръяс. Вєськыдвы-
лын и шуйгавылын кадысь кадö гымалөм моз мурөст-
лісны артиллерийскöй канонадаяс.

Лейтенант Казаринов пукаліс танк дорас да мөвпа-
ліс. Кутшөм вöлі сьökыд луныс! Войбыд сійö синсö эз
куньлы, дежуритис полкын, сэсся сьökыд марш, мед-
бöрын чорыд бой. Кыдзи сійö сөмын вермис кольны
ловйөн? А мый лоö ещö аски? А мый öні вöчö сылөн
гöтырыс, коді коли военнöй городокö? Да сійö ещö
и нөбасис, вот-вот колö вöлі мунны больничаö... «Чöрту
став мөвпьясыс!»— шуис аслыс Казаринов да стройö
сүвтöдіс взводса боецъясöс.

— Тышкасинныд ті талун левъяс моз, кыдзи и колö
сöветскöй танкистьяслы,— сёрнитис сійö.— Водзö вылö
бойяс лооны чорыдджыкось. Кутам тышкасьны мед-
бөръя вир войтöдз!.. Смерть фашистскöй оккупантъяс-
лы!.. Ни öти воськов бөрö!..

— Кутам тышкасьны!— вочавидзисны боецъяс.

* * *

Ещö быдса вежон сöветскöй танкистьяс кутисны Рö-
диналысь тайö священнöй рубежсö. Фашистьяс петалис-
ны атакаö зєв ён артиллерийско-миномётнöй би востö-
мөн, танкъясөн, но бöрынътчылісны ыджыд воштөмьяс-
өн. Эз вермы найöс жугöдны и гитлеровскöй авиация.
А войналөн медводдза луньясö противникöс кутны
граница дорын быдса вежон — ыджыд подвиг. Со мый
тайö фронт йывсьыс гижліс аслас дневникын фашист-
скöй генерал Гальдер войналөн коймөд лунö: «...рус-
скöйяс быдлаын тышкасьöны медбөръя мортöдз. Öт-
кымынъяс тышкасьöны, кытчöдз найöс он ви...» И сö-

мын командованиелөн приказ серти танкистьяс бө-
рыньтчисны виль рубеж выло.

Великёй Отечественнёй война чөжөн уна гырысь,
вир кисьтана боясын участвуйтис Николай Иванович
Казаринов. Сійө дорйис фашистскёй захватчикьясыс
Киев, Харьков да сөветскёй Украинаса уна мукөд картъ-
яс. Вөвлі сійө Сталинградскёй, Брянскёй, Западнёй, Ле-
нинградскёй да уна мукөд фронтъяс вылын. Участвуй-
тис Румыния, Польша, Германия мездөмын. Взводса ко-
мандирсянь сійө быдмис танкөвёй полклөн штабса на-
чальникөдз, веськөдліс гырысь боевёй операциясөн.
Фронтъяс вылын боевёй подвигыясыс наградитөма дас
нель правительственнёй наградаясөн, сы лыдын вит
орденөн.

Но сылөн паметьын медся вунөдлытөмөн колис Оте-
чественнёй войналөн буретш медводдза луныс. Сэки
вөлі шедөдөма медводдза боевёй опыт, коді сгөдитчис
война чөж. А главнөйыс, тайө луныс петкөдліс, мый не-
мецко-фашистскёй захватчикьясөс позьө успешнөя
нөйтны.

Кор танкөвёй полкса ветеранъяс чукөртчисны Моск-
ваө, медым пасйыны Победа лунлысь 20-өд годовщи-
на, первойөн казьтылісны войналысь медводдза лун,
кызди медся төдчана событие.

— А помнитан, кызди ми нөйтім фашистьясөс мед-
воддза бой дырйи?..

Өні запасса подполковник Николай Иванович Каза-
ринов олө Сыктывкарын, уджалө дорожно-строитель-
нөй управлениеса трестын инженерөн.

ОРУДИЕСА КОМАНДИР

Оз ло өшыбкаөн, шуам кө, мый фронт вылын мед-ся сьöкыд службаыс вöлі 45-миллиметрöвöй полкöвöй пушкаса расчётлөн. Татшөм орудиеыс пыр муніс пехо-такöд орччөн. Сійöс кокныдджыка позис нуны места-ысь местаö, вуджöдны юяс вөмөн плацдармъяс вылө. Расчөтса артиллеристъяс медводзөн примитліс-ны бой. Көть ичөт тайö пушкаыс, но Отечественнöй война дырйи сөветскöй воинъяс кыин сійö вöлі вынйö-ра оружиеөн.

Буретш татшөм артиллерийскöй расчөтөн и ковмис командуйтны фронт вылын сержант Анатолий Иванов-лы. Чужліс да быдмыліс сійö Мутница сиктын. Армияö муніс 1942 вося августын, кор сылы тырис на сөмын дас көкъямыс арöс. Велöдчис учебнöй дивизи-онын, сэсса веськаліс 76-öд гвардейскöй дивизияö. Сэні сылы дөверитісны полкöвöй пушка.

Медводдза боевöй крещениесö Анатолий Иванов примитіс Сухиничи кар мездігөн. Нöйтіс фашистьясöс сылөн расчөтыс и Курскöй дуга вылын, көть и эз глав-нöй направлениеас. Но тышкасьны ковмис вынъяс жалиттөг.

...Миян подразделенияяс некыдзи эз вермыны босьт-ны öти нöрыс. Сы мөдар бокун сулалісны гитлеровець-яслөн кык пушка. Кыдзи сөмын кыпöдчас нöрыс йылас миян танк, сы кузя лыйöны. Тадзи фашистьяс сотісны куим танк.

Вот сэки и Анатолий Ивановлы батареяса командир сетіс приказ: бура маскируйтчөмөн пушкасö кыпöдны

норыс вылас да бырөдны вражескөй пушкаяс. Сержант тшөктіс лэдзыштны орудиесьыс щитсө, медым враг эзджык казаяв турун пөвстті кыссигөн. Көть и орудиеьыс абу сьөкыд, но кыпөдны норыс йылө сійөс эз вөв кокни да ещө дзик противник ныр улө. Уна син видзөдісны збой артиллеристьяс бөрся.

Со и норыс йылыс. Иванов сетіс знак сувтны, а ачыс кыйөдчөмөн кутіс видзөдны норыс улас. Да, противниклөн пушкаяс сулалісны зэв матын. Бойсө вермис решитны смеллун. Сержант зарадитіс орудиесө да лыйис фашистьяслөн пушка кузя. Бура тыдыштліс, кызди качліс сынөдө сылөн стволыс. Сэсся дыр думайттөг бырөдіс и мөд орудиесө. Танкьяслы туй лои восьтөма.

Тайө бойсьыс Анатолий Иванов пөлучитіс медводдза боевөй награда — «За отвагу» медаль. Мөд татшөм жө медаль сылы сетісны Днепр вуджөмысь. Но воддзаыс сылы вөлі ёна донаджык.

...Рытивывы Белоруссияө пыригөн мян войскалы ыджыд отсөг сетісны партизаньяс. 76-өд гвардейскөй дивизияысь өти отрядөс найө пыртісны асланыс ордымьясөд фашистьяс тылө. Отряд, нем виччысьтөг уськөдчөмөн, босьтіс көрт туй станция да ородіс туйсө Брестө. Но гитлеровецьяс эз көсийны миритчыны тайөн. Найө мөдөдісны станция вылө дас гөгөр танк, кодьяс локтісны пушкаясысь да пулеметьясысь лыйсигтырйи. Сэн жө лэдзисны ас водзаныс тшын.

— Газ лэдзисны! Газ...— советскөй воиньяс пөвстсьыс горөдіс кодкө. Заводитчис паника. Отряд энөвтіс станциясө да кутіс бөрыньтчыны.

Тані бара петкөдліс асьсө Анатолий Ивановлөн орудийнөй расчётыс. Сылысь пушкасө вайисны татчө дзик кияс вылын моз. Но станцияөдз эз воны, паныдаліс нюр. Та вөсна сійөс сувтөдісны станциясянь некымын сө метр сайын.

Иванов аддзис, мый вражескөй танкьяс веськыда сы вылө оз мунны. А кутасны кө вөтөдны пехотаөс, сөмын

насып вывтї, кодї вöлі веськыдвылынджык. Иванов виччысис, мый лоö водзö.

И збыльысь фашистскöй танкъяс петісны: насып вылö да, öтар-мöдарбокса ягас лыйлігтыр, мöдöдчисны водзö. Öти вражескöй снаряд взорвитчис дзик орудие дорын да виис наводчиксö. Иванов ачыс кутчысис прицел дорö. Фашистскöй танкъяслөн öні тыдалісны бокъясыс, кытчö лыйлыны медся лöсьыд. Сылысь орудиесö гитлеровецъяс эз казавны. Тайö сідз жö вöлі ыджыд көзырөн.

Иванов дыр думайтіс, кутшöм танкö лыйны. Шуис лыйны медбөрря машинаас, медым воддзаясыс эз казавны. Медводдза снарядыс жö веськаліс местаö: танкысь первойсö пуркнитіс съод тшын, сэсса ставнас сійö ыпнитіс биөн. Тайö, тыдалö, повзьöдіс фашистскöй танкъясöс. Гашкö, найö думайтісны, мый сэні сулалö быдса батарея. Найö кежисны насып бокö. Иванов ещö некымынысь лыйис на кузя. Противниклөн танкъяс бöрыньтчисны, кымынкö вöйины нюрö, и найöс враглы ковмис кольны сэтчö. А сэк кості миян отряд бөр босьтіс станциясö.

Тайö подвигсыс Ивановöс наградитісны Краснöй Звезда орденөн. Сійöс примитісны Коммунистическöй партияö.

...Висла! Мыйта героическöй подвигъяс петкöдлісны тайö ыджыд юсö форсируйтігөн сöветскöй воиньяс! Фашистъяс сійöс укрепитісны быд боксянь да лыддисны «вуджны вермытöм крепостьөн». Но сэки, войналөн медбөрря тöлысьясö, эз нин вöv некутшöм вын, медым сувтöдны сöветскöй войскалысь водзö мунöмсö. Миян войска босьталісны Висла ю мöдарысь плацдарм бöрся плацдарм да кутісны ас кианыс найöс ыджыд наступлөние заводитчытöдз.

Öти татшöм плацдарм вылын ковмис тышкасыны и Анатолий Ивановлы. Висласö найö вуджисны войнас,

веськыда йи вывтіыс. Вуджөдісны кык 45-миллиметрө-
вөй орудие, өтиыс — Ивановлөн.

Асывнас немецъяс петісны контратакаө, медым бөр шыбитны ю мөдарас плацдарм дорйысыясөс. Найө өт-
тшөтш восьтісны чорыд би миномөтъясысь да пулемөтъя-
сысь. Но сөветскөй воинъяс эз повзыны. Найө паны-
далісны врагөс сідз жө чорыд биөн. Фашистъяслы бөр
ковмис бөрынтьчыны.

Час-мөд бөрын гитлеровецъяс кыпөдчисны контра-
такаө мөдысь. Оні налөн биыс вөлі ещө на чорыдджык.
Ивановлөн расчөтысь колісны сөмын куимөн, а мөд
орудиесө жугөдіс фашистскөй снаряд. Ивановлысь
осколөкөн сідз жө орөдіс кык чунь, но сійө эз вешы
пушка дорсыс. Сөветскөй воинъяслөн позиция дорө
бара эз вермы матыстчыны ни өти фашистскөй салдат.

Рытланьыс нин противник петіс коймөд контратакаө.
Лои босьтчыны оружиеө весиг сьөкыда ранитчөмаяс-
лы. Луннас Висла ю мөдар берегсянь, дерт, некод эз
вермы локны отсөг вылө. Бой кыссис пемдытөдзыс.
Враглы бара лои бөрынтьчыны...

А войнас став ранитчөмаясөс нуисны госпитальө, на
лыдын и Анатолий Ивановөс. А бөрынджык тайө бой-
сыыс сылы сетісны мөд степень Слава орден. Коймөд
степень Слава орден сійө пөлучитіс нин водзджык.

Та бөрын сылы ковмис на тышкасьны фашистъяскөд
Одер вылын, Берлин дорын. Воліс сійө и Эльбаөдз.

Великөй Отечественнөй война бөрын Анатолий
Алексеевич Иванов помаліс заочнөя связь техникум.
Оні сійө уджалө Сыктывдінскөй районын связь узелса
начальникөн. Сійөс частө корлывлөны пионеръяс казь-
тивны аслас ратнөй подвигъяс йылысь.

СОДЕРЖАНИЕ

Õти подвиглõн история	3
Тихвинсянь рытыввылын	8
Сылõн гуыс Латвияын	12
Вит ордена кавалер	24
Курской дугаса герой	31
Сийõ вõли сапёрõн	35
Партизанской ордымъясõд	38
Зарни кияс	42
Диверсант чеччыштис парашютõн	46
Вуджанин корсигõн	49
Сьõкыд лун	54
Орудиеса командир	60

Шурганов Михаил Михайлович

ОНИ ЗАЩИЩАЛИ РОДИНУ

На коми языке

Редактор Л. Барышева
Худож. редактор М. Безносков
Техн. редактор А. Вишнева

Сдано в набор 22/V-70 г. Подписано к печати 20/VII-70 г.
Формат 70×108^{1/32}. Бум. л. 1,0, печ. л. 2,74. (Уч.-изд. л. 2,6).
Заказ № 3037. Тираж 2400 Ц00639. Цена 7 коп.
Коми книжное издательство, Дом печати.

* * *

г. Сыктывкар, Республиканская типография
Управления по печати при Совете Министров
Коми АССР.

7 нбл.

КОМИ КНИЖНОЕ ИЗДАТЕЛЬСТВО 1970